



TOMANATUGA FA'ALEAGAGA NOVEMA 2022

Tusi Faitau - Isaia 61:1-9 (F.Tuai); Luka 4-14-21(F.Fou)

Matua - "Ole aso nei,ua taunuu ai lenei o outou o faalogologo ai."

Manatu Aoao - "O Keriso le Taunuuga o le Fa'aolataga."

Ole agaga fiafia, ou te toe ofo-alofa ma toe Faatalofa atu ai fo'i i le Paia ma le mamalu ole tatou Kapelenisia, mai lava i ou mauga maualuluga seia paia lava le tinifu. O Paia i le afifio ile va'a lanu ole Talalelei, Paia ma mamalu faaleatunuu ole a gona, aua o Paia ma mamalu mai le vavau e o'o lava i le faavavau.

E le faagaloina le tapua'iga a nai o tatou Aiga ma uo mamae aemaise le lasilasi ole tatou au faitau ole tatou auaunaga lenei, O le Taulogologo. Malo lava le onosa'i, faafetai ona o la outou tapua'iga mau.

Ae alo maia lau faitau,o se TOMANATUGA FAALEAGAGA mo i tatou aua le tatou folauga ole fa'atuatua mo lenei foi Masina Fou

Fai mai le tatou MATUA " O le aso nei ua taunuu ai lenei Tusi; o outou o faalogologo ai."

Ina ua mavae fa'aoso'osoga o Iesu e tusa ma le tala a Luka,ona toe fo'i atu lea o ia i lona Nu'u o Nasareta. Ua i ai se mea tulaga 'ese ua tupu nei; o Iesu le atalii fa'aleiloga ole kamuta,ua fa'afuase'i nei ona logologo-a ona tala. O le mea lea, a'o maluu atu o ia,fai mai ua logo atu fo'i le tala ia te ia ua so'o ai lava le itu uma." (Lk 4;14) Ole taimi lea o lo'o faatalitali mai ona tagata ma le loto naunau,e fia maimoa ini fa'ailoga po'o ni mea ofoofogia na te faia i o latou luma. Ua fia vaai tele i latou po'o a lava mea ua mafua ai ona logologo-a ma ta'utaua o ia, e pei lava o lana masani,ona tu'u ane lea ia te ia le Tusi e faitau. Fai mai a'o faitau o ia,sa taufai pulato'a uma mai ia te ia i latou uma o e sa i ai ile sunako, o tagata ua fia faagae'etia le fia iloa ona

o le maofa ole tulaga ma uiga fou ua aliali mai i le atali'i fa'ale-aloaia o lo latou Nu'u. Ma e le taumate, na fa'ateia atili i latou 'ina ua uma loa ona faitauina e le Alii nisi Upu mai le Isaia,ona tu'u'ese lea o le Tusi ae fai atu loa i Upu ia ua avea nei ma a tatou matua." Ole Aso nei ua taunuu ai lenei Tusi; o outou o faalogologo ai."

Ole ulua'i manatu: "Ua taunuu ia Keriso le fuafuaga Paia a le Atua."

Ole afio mai o Iesu, ole Taunuuga lea o le faamoemoe ua leva ona tu'utu'u gutu ma tu'utu'u taliga mai i auga tupulaga ole Nu'u o Isaraelu le faamoemoe i se Tupu fa'a-Mesia na te lagaina le to'ilalo popo ma le matagā o Isaraelu ma na foa'i mai se laveaina ma se sa'olotoga mo i latou. Ae peita'i,na le afio mai Iesu i le auala sa faamoemoeina e Isaraelu, aua sa manatu i latou i se auala fa'a-Tupu ma le fa'aaloaloga. Aisea? Aua fo'i e le'i afio mai Iesu e faatanuu fuafuaga ma mafaufauga o tagata Isaraelu. O lona afio mai 'ina ia faatanuu le fuafuaga Paia a le Atua mo le fa'aolataga o Isaraelu atoa ai fo'i ma le lalolagi. Ole fuafuaga ole Alofa maualuga ma le silisili 'ese ole Atua, a'o se auala fo'i ma se fuafuaga e faavae ma laualuga ile ALOFA ma le Loto-Maualalo ma le Agamalu, aemaise ai isi mau uiga lelei uma lava faa-le -Atua. Ole fuafuaga e le faia i ai ni tonu po'o ni manatu o ni tagata pe latou te taumafai fo'i e lolo'u pe fa'asesē. Na taumafai malosi le tiapolo e fa'asesē 'ese,e pei o le tala i ona fa'aoso'osoga e pei ona ta'ua ile amataga ole mataupu lava lenei ua maua ai le tatou matua; ae le'i mafai. " E alu lava le atalii ole tagata e faapei ona tusia ia te ia..." o se tasi lea Afioa a lo tatou Alii. A'o le mea tonu lea

AFIOGA KATINALE JOHN DEW



13 Oketopa 2022

Ia iā te outou uma le filemū

“Ae o fua a le Agaga Pa’ia o le alofa, olioli, filemū, onosa’i, mataalofa, agalelei, fa’amaoni, agamalū ma le amio mamā. O na upu o ni vaega o le faitauga mai ia Sagato Paulo ia Kalatia. E masani ona ou talisapaia lena lisi ua tatou iloaina nei o fua a le Agaga Pa’ia. Ae ua tatou iloaina fo’i e muamua mai le fa’afeagai, o uiga po o auala o le ola e faigofie ona avea ma vaega o tatou fo’i olaga vaganā **“ua ta’ita’ia i tatou e le Agaga.”**

A ou fa’alogologo a o folafolaina lenā faitauga e lagonaina upu e uiga i le ita, femisa’ai ma le fuā, maitaita, manatu’ese ma le faitaga’i ma fe’ese’ese’aiga ua tumu i le tatou lalolagi ma e fa’anoanoa tele ona o tagata ma palisi ua fetau’i ma leai se maliliega e maua, o ou manatu ua liliu i le tonu – o fua a le Agaga Pa’ia.

E masani ona ou fa’alogo i Ta’ita’i Fa’aleagaga o laulauina le Tatalo Tomanatunatu o le EXAMEN (e masani ai le Ituaiga o Iesu) - o se

tasi o faiga fa’aleagaga ua sili le taūa so’o se isi o tatou e mafai ona faia, ma o a tatou faiga tatalo uma lava o se tasi lenei e tatau lava ona tatou faia. Mo se fa’ata’ita’iga, e taūa i aso ta’itasi ona fesili: o a mai ni ou fa’amanuiaga? O a ni mea e ao ona ou fa’afetai atu ai? O le a le mea ua aumaia ia te a’u le fa’amoe-moe i aso ta’itasi? Mo a’u lava, ou te mana’o e fesili po ofea o i ai fua a le Agaga Pa’ia. Pe na ou tuputupu a’e i lenei aso i le alofa, olioli, filemu, onosa’i, mataalofa, agamalu, agalelei, ma isi fua a le Agaga Pa’ia. O se auala matagofie e fesili ai iā i tatou lava “pe o o’u ola ai i lau mafutaga ma le Atua ma isi tagata o lo’o mafuta atu i ai”? O na fua a le Agaga Pa’ia e lē o ni mea tatou te mauaina e tatou lava; o i’uga na a le Agaga Pa’ia ua ola ai i totonu ma mafai ai e tatou ona ola ai i le pa’iaga. O le mealofa a le Agaga Pa’ia ua tu’uina mai iā i tatou i le Papatīsoga ma le Kofilimasio, fa’afouina i tatalo ma o se punavai tumau o fa’amanuiaga.

So’o se isi lava o tatou e mafai ona fesili pe fa’apefea ona tatou ola ai i fua a le Agaga Pa’ia. Ou te manatu o se fesili e taūa fo’i mo a tatou palisi, o a tatou fa’apopotoga o aoga ma o tatou aiga, ina ia faia se malologa ma fesili po fa’apefea ona tatou aga’i i luma. Afai e mafai ona tatou maitauina o lo tatou ola ai i le alofa, fiafia, filemū, onosa’i agamalū ma le amio mamā – ona tatou avatu lea o le fa’afetai i le Atua.

27 Oketopa 2022

Toe Fa’atalofa atu i lenei aso

O le aso muamua Novema o le a tatou patipatia ai le Sulufaga o le

Au Pa’ia Uma e fa’amanatu ai tagata matagofie ma le lelei ua tatou iloaina ma se aso e tatalo ai mo latou ua maliliu. I tausaga uma tatou te tomanatu ai i le taūa o le tatalo mo latou ua maliliu, ma ou te iloaina ou te mana’o fo’i i tagata e tatalo ma a’u.

Ou te fiafia i le fa’amanatuina ole aso mo Tagata Pa’ia uma, ua fa’amausalī mo tatou e iai se nofoaga mo tatou ma le Atua, e pei ona fai mai Pope Faranisisi: *“E le fa’apea ona o tatou e lelei, ae ona o le pa’iaga o le Atua ua a’afia ai o tatou olaga...E mafai ona tatou fa’atusatusa le au Pa’ia i fa’amalama o falesa ua mafai ai e le malamalama ona ulu atu i totonu i lanu ‘ese’ese. O le au Pa’ia uma o o tatou tuafafine ma uso ua fa’aulufale le malamalama o le Atua i o latou loto ma ua aumai i le lalolagi, ta’ito’atasi e pei o a latou lanu. Ae sa latou manino ma fa’anaunau e ave’ese le pisia ma le pogisa ole agasala, ina ia mafai ai e le malamalama o le Atua ona ulufale mai. Ole mafu’aga lea ole olaga: ina ia mafai e le malamalama a le Atua ona sau i totonu; o le mafu’aga o tatou fo’i olaga.”*

O le au Pa’ia o latou ia sa savavali fa’atasi ma i tatou – i o tatou autafa. Na o mai i tausaga ‘ese’ese, atunu’u ma gagana. O latou o ni faia’oga ma le au tala’i, epikopo ma le au fai telosia, ‘au’auna o le alofa, o latou ua fa’aosofiaina iā latou upu ma latou e alolofa i isi. O latou ua fa’amanu’alia ma vaivai, mau’oa ma le au matitiva, o tagata lotu, ositaulaga ma tagatā lotu, tinā ma tamā, le au vevesi ma le au tatalo, talavou ma le au matutua. O latou

loto ma lima ua avatu ile Atua i aso o le tigaina ma itula o le faigofie – ona o mealofa a le Atua, ae lē o a latou faiga. Ua tatou va'ava'ai ia i latou ina ia tatou fo'i ona pei o Keriso o lona suafa ua tatou tauavea.

E ala iā latou upu, ua tatou fa'alogoina ai lauga a le Atua. E ala ia latou amioga ua tatou va'aia le alofa tino i augatupulaga uma. E aula iā latou gaoiga o le alofa ma agalelei, ua latou fa'ate'ia iā i tatou lo tatou fa'anaunau mo le Atua. Ua latou faia lenei ile taimi nei a o latou si'osi'omia i tatou: o se ao tele o molimau.

Ua latou fa'alototeleina i tatou ma tatalo mo tatou. O le au Pa'ia ua taliaina a tatou tatalo, fa'atasi ma i tatou i tatalo ia latou tatalo e le uma i le Tama e ala atu ia Keriso i le Agaga, talosagaina le alofa'aga a le Atua mo tatou ma latou ua tatou alolofa atu i ai. Mo le filemu ma le fa'aleleiga i o tatou aiga, atunu'u, ituaiga ma vasega, tatou te tatalo. I le fa'afetai molia mo a tatou soifua maloloina lelei ma le mealofa o aiga ma le fa'auō, tatou tatalo. Mo a tatou ta'ita'i lotu ma le malō, tatou tatalo.

Fa'atasi ai ma le au tagata pa'ia i le mamalu, tatou tatalo. Tatou tatalo fo'i mo latou o lo'o aga'i atu i le mamalu, tatou tatalo ina ia avea i tatou uma o le Tino e tasi, tasi le Agaga ia Keriso.

Nāku noa. Nā
+ loane

TOMANATUGA FA'ALEAGAGA NOVEMA 2022

na faigata ai tele e lutaia ona talia lesu, ona ua le ui mai o ia ile ala sa latou faamoemoeina. O lea na latou matua'i tete'e atu ai ile Alii ma ua latou manatu, e le faapea se mesia le matua'i maualalo tele o lona o'o mai. Ae talofae, ua lilo ia te'i latou, ole Mesia lea ua afio mai ile ala faa-le -Atua ina ia taunuu ai le fuafuaga Paia a le Atua lava ia. Ole mea lea e ui lava ina tete'e mai i latou o e na latou le fia taliaina o ia, a'o lea ua fetalai atu lesu lava ia i Upu e malamalama gofie e faasino i le valo'aga lea na ia faitauina. Fai mai o ia. " Ole Aso nei, ua taunuu ai lenei Tusi...."

Tusa lava po ole a le malosi ole tete'e mai o tagata, e le mafai ona tineia ai le Upu moni. Ua taunuu le Upu moni, le fuafuaga Paia a le Atua. O ai la a toe fai sona loto, o ai a toe gugū o lea ua i o latou luma le Tupu, o lenei ua toai lē ua fa'au'uina (Mesia) O ai se a toe vaai 'ese ua pafale le olataga mai le Atua. E leai se isi e toe faatali i ai na ole mea e tasi, ia talia loa o ia ile loto salamo ma le fa'atuatua moni; ona faaolaina lea.

O lona uiga ole Talalelei o le sa'olotoga ma le fa'aolataga o lo'o tautala nei i ai le Tusi, ua faataunuuina lea ma le atoatoa ia te ia. O ia o le tualuga ole fuafuaga Paia a le Atua, ole tumutumu ole Tusi Paia, ma ole faatinoina ma le atoatoa ole Talalelei o le fa'aolataga, o ia lava le Talalelei. O lona soifuaga atoa lea, o ona puapuaga, o lona maliu, atoa ma lona toe soifua mai ma le manumalo, ole Talalelei lena e ao ona folafolaina atu ma molimau i ai le lalolagi.

Ole Tala e lelei, ole Tala leo malie, o le tala ile Alofa laveaina e le Atua o tagata uma e aofia ai fo'i Oe ma a'u le tagata agasala. Ole tala i mea ofoofogia ma le tutasi ua faia e le Alii mo i tatou ma le lalolagi uma, lea ua taunuu ia Keriso le na fetalai mai." Ole aso nei, ua taunuu ai lenei Tusi, o outou o faalogologo ai."

Le au uso e, le tatou Kapelenisia e, ole mea aupito i maualuga lenei ma le silisili 'ese ua faia e le Alii mo i tatou uma. Ole foa'i e sili ona atoatoa mai le Alofa e silisili ona moni, ma e moni pea lava e faavauvau. Ioe, ua ia galueaina toatasi le fa'aolataga mo i tatou uma, ma ua foaifuaina mai lea mo so'o se tasi. Tau lava ina ia moni lo tatou tali atu i ai ile loto faafetai, ia moni lo tatou talia ile loto salamo ma le fa'atuatua e pei ole moni o lona Alofa ma lana foa'i. Tatou tuuina atu ia i tatou e'i tatou lava, o o tatou loto, ma o tatou mafaufau, ma o tatou olaga atoa ia te ia, aua o ia lava lea ua tatou ola ai, ona tatou saga ola ai lava lea faatasi ma ia e faavauvau.

Manuia tele le faiga-malaga ole fa'atuatua mo lenei foi Masina o NOVEMA

Ia manuia tele ona o Keriso

Amene

Soifua

Vauei & Veronika Tuitolova'a

FK.

¹“Ua o’o i le aso tolu, ona fai ai lea o le tausama’aga i Kana i Kalilaia; sa i ai fo’i le tinā o Iesu. ²Na tala’iina fo’i Iesu ma ona so’o i le tausama’aga. ³Ua uma fo’i le uaina, ona fai atu lea o le tinā o Iesu iā te ia, “Ua leai sa latou uaina.” ⁴Ua fetalai mai Iesu iā te ia, “Funa e, se a ea lau na iā te a’u? e le’i o’o i lo’u itu aso.” ⁵Ua fai ane lona tinā i ‘au’auna, “O se mea lava e fai mai ai o ia iā te outou, ia outou faia.” ⁶Sa i ai vai ma’a tetele e ono, e tailuagafulu pe taitolugafulu kalone, pei o le tu o le fa’amamāina o lutaia. ⁷Ua fetalai atu Iesu iā te i latou, “Inā fa’atutumu ia o vai i suāvai.” Ona latou fa’atutumuina lea, ua o’o lava i lau. ⁸Ua fetalai atu ia iā te i latou, Inā asu ane ia, inā ave i lē pule i le tausama’aga.” Ona latou avatua lea. ⁹Ua tofo fo’i lē pule i le tausama’aga i le vai ua liu uaina, a ua na le iloa le mea na maua ai (a o au’auna na asu le vai ua latou iloa), ona valā’au atu lea o lē pule i le tausama’aga i le fa’atoafaiavā, ¹⁰ua fai atu iā te ia, “E muamua ona aumai e tagata uma o le uaina lelei; pe a tele fo’i le inu i ai o tagata, ona aumai ai lea o le uaina leaga; a ua tu’u e ‘oe le uaina lelei, ua o’o mai i lenei itu aso.” ¹¹Na faia e Iesu lenei ulua’i fa’ailoga i Kana i Kalilaia, ma fa’aali mai ai lona mamalu; ona fa’atuatua ai lea o ona so’o iā te ia. ¹²Mulimuli ane ua maliu ai i Kapanaumi, o ia ma lona tinā, ma ona uso, ma ona so’o; a e le’i nonofo ai i ni aso e tele (Ioane 2: 1 – 12).

O lenei fa’amatalaga ua aumaia le fa’atusa o Maria i le lalolagi nei ma fa’aeaina o ia i le lagi. O le taimi lava lea, o se fa’aaliga o le mata’itu alofa a Maria i mana’oga a tagata o le lalolagi nei ma lona malamalama fa’aperofeta i se mea e sili atu i le olaga i aso ta’itasi. E pei i le fale a Sakaria, ua tatou toe maua o ia i Kana o se ‘au’auna agamalū e fesoasoni i mea fai a le aiga. Atonu o se fa’ailoga o le fa’aaloalo aga’i iā Maria na valā’auliaina ai Iesu ma ona so’o. O le tulaga sa sau o ia ma tele o uō o se vaega na mafua ai le māāsiasi ai i le i’uga ua leai se uaina. O le mafua’aga sa ia aumaia lea tulaga i lana tama o se fa’ailoga o lona agalelei ma lana fa’aosofiaga e le Agaga Pa’ia. Sa ia lē fa’atonuia Iesu le mea e fai. O lana tatalo o se loto tele ma e loto mauualalo. O se fa’ata’ita’i lenei mo a tatou tatalo. E lē fa’aosoosoina i tatou i nisi o taimi e ta’u atu i le Atua mea e tatau ona ia faia i lo le tatala atu o tatou mana’oga i ona luma ma talosaga atu iā te ia mo le kalasia ina ia fa’atonutonu o tatou manatu i lona finagalo? I se tatalo fa’amauualalo e pei ona faia e Maria, o le a tatou amata ona mauaina ni fua ua sili atu i mana’oga vave, ma o le a tatou iloina o le Ali’i e sili atu lona silafiaina o mea e sili le lelei mo i tatou.

O le vavega a Iesu i Kana o se tali atu i lona tinā o le faiga fa’aperofetaga. O upu ta’itasi ma gaoigaga e tumu i le ‘oa ona uiga ma ua tatala mai ai ni vaega fa’atafa’ilagi fou. O le upu a Maria i ‘au’auna, o se upu o lo’o foliga mai o lo’o aga’i mai iā i tatou ta’ito’atasi, e tatau ona tatou mata’itū i ai: ‘O se mea lava e fai mai ai o ia iā te outou, ia outou faia.’ O le mea lenei o lo’o i le fatu o le tapua’iga moni ia Maria. O Maria, o lo tatou tinā, e le o iai se isi fa’anaunau-ga tele i lo le tosina atu o tatou, alofa ma usita’i iā Iesu. Tatou te fa’amamalu iā Iesu a o tatou mulimuli iā te ia ma faia po o le a lava le mea e fai mai ai iā i tatou i lana upu, kalasia, ola ma le maliu fa’apea mea uma na tutupu i lona soifuaga.

O le tatalo a Maria o le ulua’i fa’ailoga tele na fa’aalia ai e Iesu lona malosi mamana. O Maria ua pei o se uō a se tusi āta i nisi o taimi, e ala i upu tu’ualalo, ua aumaia le tusi āta i se malamalama’aga atoa i lana galuega. O le ulua’i talia Iesu ua maua i ai ni fa’aliliuga ‘ese’ese, ae o upu e tatau ona va’aia i o latou fa’aogaina. E lē o maua i ai le musu po o ni tu’ua’iga.

O Iesu i lenei taimi, e lē o fa’apea mai, ‘tinā’ – ae ua fa’apea mai ‘fafine’. O le fa’amatalaga lava fo’i lea e pei i le folafolaga tele a le Atua i le tusitusiga: ‘Ou te fa’atupuina le feitaga’i iā te oulua ma le fafine’ (Kenese 3: 15). I luga o le Koluse, ua toe ta’ua e Iesu lona tinā o le ‘fafine’; ma le fa’aaliga o le fafine ta’uta’ua na amatalia e le tusi o Kenese ua sau i lona aotelega i le tusi o Fa’aliga, mataupu sefululua. I le va’ai a Iesu, i lenā taimi mamalu i Kana, o Maria ua sili atu i lo lona tinā tuma’oti. O ia o le fa’ailoga sili o le folafolaga, o se fa’ailoga fa’aperofeta ua fa’amausalīina e le ulua’i vavega na galue ai Iesu i le va’aiga o ia, o le ‘fafine.’

Fai mai Iesu, ‘E le’i o’o mai lo’u itula.’ O le mea lea ua tupu, i lona maoa’e e pei ona i ai, e tatau ona va’ai i ai i le malamalama’aga o le itula tele ina ua fa’amaligi e Iesu le toto o le feagaiga fou ma le fa’avavau, fa’aipoipo atu o ia e fa’avavau ma le tagata fa’aolaina. O Keriso o le ali’i fa’atoā fa’aipoipo ua fa’asaoina le uaina sili lona lelei se’ia taunu’u i le i’uga.

O le māasiasi a le teine ma le tama na fa'aipoipo i Kana, ua maua ai se vavega maoa'e tele, o se fa'ailoga tauagafau o puapugatia sa sauni i ai le fa'aipoipoiga i le va o Keriso ma le Ekalesia. O lo'o au ai Maria i nei mea e lua. E vala'auina ma fa'atauana i tatou: 'O se mea lava e fai mai ai o ia ia te outou, ia outou faia'. Ma o ana upu o se apoapoa'iga fa'aleagaga ma se mealofa.

Matou te vivi'i ia te oe, Tamā a lo matou Ali'i Iesu Keriso; ona o lenei mea na tupu, ua e fa'ailoa mai ai le Atamu fou, ma le Eva fou, le fafine Imakulata, fa'ata'ita'iga a le Ekalesia. Matou te fa'afetai atu ia te oe; ona o lou Agaga na e fa'aosofiaina ai le tatalo loto maualalo na maua ai le fa'ailoga muamua a lo matou fa'aolataga. Foa'i mai ia i matou lou kalasia, i lenei mea na tupu ma mea uma ua tutupu i o matou olaga ia matou maua ai le uiga loloto o le fa'aolataga.

Maria e, le matagofie o lau fautua tatalo! Ua e iloaina ona vivi'i Iesu i au tatalo. Tatalo mo i matou, e pei ona e faia i Kanana, ia matou a'oa'oina ona tatalo mo le tasi ma isi, a o sauni e fesoasoani atu i le tasi ma le isi ma tauave le avega mamafa le tai ma isi. Amene.

APOAPOA'IGA FAA-APOSETOLO A LE TAMA PAIA POPE FALANISISI I LE MAE'A O LE SINOTI CHRISTUS VIVIT – O LOO SOIFUA KERISO

MO TUPULAGA TALAVOU MA LE NUU ATOA UMA O LE ATUA

I LE FEAGAIGA FOU

12. Se tasi o fa'ata'oto a Iesu (cf. Luka 15: 11 – 32) ua fa'atatau i se "atali'i talavou" na mana'o e tu'ua le aiga ma lona tamā mo nu'u mamao (cf. vv. 12 – 13). Ae o ona manatu i le sa'olotoga na liua i le fa'aleagaina ma le ta'uvalea (cf. v.13) ma na ia fa'alogoia le tigā o le nofo to'atasi ma le mativa (cf. vv. 14 – 16). Ae ui i lea, sa ia mauaina le malosi e faia ai se amataga fou (cf. vv. 17 – 19) ma faia ai loa ma se filifiliga mautū e tula'i ma toe fo'i i le aiga (cf. v. 20). E i ai le natura i loto talavou e sauni atu mo ni suiga, e toe liliu i tua, tu i luga ma a'oa'o mai i lenei olaga. E fa'apefea i se tasi ona lē mafai ona lagolago atu i lenā atali'i i lenei fa'ai'uga? Ae o lona uso matua ua matua lona loto; o ia ua tumu i le mana'o tele, manatu fa'apito ma le loto leaga (Lk 15: 28 – 30). Ua vivi'i e Iesu le agasala la'itiiti o lē na toe uia le auala sa'o i lo lona uso sa manatu o ia e fa'amaoni, ae leai se agaga o le alofa ma le agalelei.

13. O Iesu lava ua tumau lona talavou, ua mana'o e aumai ia i tatou loto e talavou tumau. O upu a le Atua ua talosaga mai ia i tatou "ia outou fa'ate'a 'ese ai le mea fa'afefete tuai, ina ia aveva outou ma paluga fou" (1 Koronito 5: 7). Ua vala'auina i tatou e Sagato Paulo ina ia ave'ese atu ma i tatou o tatou "tagata tuai" ma fa'aali se ua "o'ofu i le tagata fou" (Kolose 3: 9 – 10). I

le fa'amatalaina le uiga o le "o'ofu i le tagata fou (v.10), ua ia ta'ua le alofa mutimutivale, agalelei, loto maualalo, agamalū ma le onosa'i, ia fa'apalepale, ma ia fefa'amagaloa'i outou pe afai ua agaleagaina se tasi e se tasi" (Kolose3: 12 – 13). I se fa'aupuga, o talavou moni o lona uiga o le i ai ose loto e mafai ona alofa atu, a o mea ua vavae'eseina mai ai i tatou mai isi ua aveva lea ma faiga ua matua ai le agaga. Ma ua ia fa'auma e fa'apea: "A o le alofa, e lautua lea i nei mea uma, o le fusi lea e atoatoa ona lelei ai" (Kolose 3: 14).

14. Ia tatou manatua fo'i e leai se aogā mo Iesu o tagata matutua e va'ai maualalo i talavou pe pule malosi fo'i i ai. Ae o lona fa'afeagai ai ia aveva o ia, ia pei o lē aupito itiiti" (Luka 22: 26). Mo ia lava o tausaga e le'i fa'avaeina ai le fa'aeaina, ma o le aveva ma talavou e lē o fa'apea mai e itiiti lona aogā ma le mamalu.

15. O le upu a le Atua ua fai mai o taulele'a ua va'aia "peiseai o uso" (1 Timote 5: 1), ma lapata'i mai i matua e "aua ne'i fa'a'ita ia outou fanau, ina ne'i fa'apalapala i latou" (Kolose:3 21). O Tupulaga talavou e le'i fuafuaina e fa'aloto vaivai; e manatu ia i latou ina ia latou fai miti i mea tetele, ia sa'ili le tafa'ilagi tele, ia va'ai maualuga, alu atu i le lalolagi, ma talia lu'itau ma ofo atu lo latou lelei atoatoa i le fausia o se mea e sili atu lona lelei. O le mafua'aga lenā ou te una'ia so'o atu ai i

APOAPOA'IGA FAA-APOSETOLO A LE TAMA PAIA POPE FALANISISI I LE MAE'A O LE SINOTI CHRISTUS VIVIT – O LOO SOIFUA KERISO

tupulaga talavou e 'aua ne'i tu'uina atu i latou e ave'esea mai ai le fa'amoemoe; iā te outou tā'ito'atasi ou te toe fa'apea atu: "*Aua ne'i inoino se tasi i lou taule'ale'a*" (1 Timoteo 4: 12).

16. Ae ui i lea, o tupulaga talavou ua u'una'ia "*ia fa'apea outou o e talavou, ia usita'i i toeaina*" (1 Peteru 5: 5). E lē o tu'ua lava le fa'atauana mai e le Tusi Pa'ia ia 'aua ne'i tu'ua le fa'aaloalo tele e avatu i le au matutua, ona o lo'o ia i latou le anoanoa'i o le 'oa o le poto masani; ua latou iloaina le manuia ma le fa'aletonu, fiafiaga o le olaga ma puapuagā, o ana miti ma le lē fiafia. I le malu o a latou loto ua latou teu ai le poto masani e mafai ona a'oa'oina ai i tatou ina ia aua ne'i

faia ni mea sesē po le ioe atu i ni folafolaga e lē moni. O se atamai anamua ua talosaga mai ina ia fa'aaloologia ma le mautinoa muta'aga manino ma ia iloaina lelei o tatou lagona: "*ia fa'apea fo'i ona e apoapoa'i atu i taulele'a, ia fa'autauta i latou*" (Tito 2: 6). E leai fo'i se fesoasaoni ia i tatou pe afai o le a tatou 'au atu i faiga lē talafeagai pe lē amana'iaina fo'i isi ona ua matutua pe mai se isi augatupulaga. Ua fai mai Iesu iā i tatou o le au popoto ua mafai ona latou aumai mea fou ma mea tuai mai a latou tu'ugāoloa (cf. *Mataio 13: 52*). O se talavou e atamai e tatala atu o ia i le lumana'i, ae e mafai lava ona a'oa'oina mai le poto masani mai isi...*fa'auaua pea*.

TUSI FA'A-APOSETOLO A LE TAMĀ PA'IA FARANISISI DESIDERIO DESIDERAVI

6

MO EPIKOPŌ, FAIFE'AU MA TI'ĀKONO, MO ALI'I MA TAMA'ITA'I FA'AU'UINA MA LE AU FA'ATUATUA UMA E UIGA ILE TAPENAINA OLE SOIFUA TAPUA'I O FANAU A LE ATUA (*Fa'auau mai le lomiga o Setema*)

*Desiderio desideravi
hoc Pascha manducare vobiscum,
antequam patiar* (Lk 22:15)

O lona tolu lenei o vaega ole Tusi Fa'a-Aposetolo a lana afioga ile Tama Paia ia Pope Falanini, ua fa'aliliuina mo le mamalu ole au faitau.....(fa'aliliuina Lauano A. Ilaoa)

Ole toe mauaina ole matagofie i aso uma ole moni ole patipatiga ole avea ma Kerisiano

21. Ae peitai, e tatau ona o tatou fa'aeteete: ina ia aogā le vaifofō ole Tapuaiga, e mana'omia i tatou i aso uma ina ia toe maua mai le matagofie ole moni ma le fa'amaoni o le patipatiga ole avea ma Kerisiano. Ou te toe fia ta'ua tasi ai le uiga fa'atelosia, e pei ona fa'amauina ile vaega.7 ole *Sacrosanctum Concilium, o loo matagofie ai lona fa'amatalaina*: ole Tapuaiga ole tofiga ositulaga o Keriso, ua fa'ailoa mai ia i tatou ma tu'uina mai i lona Misitelio ole Paseka, e pei ona iai ma gaiōi e auala i fa'ailoga va'aia o fa'alogō'aga (ole vai, suau'u, falaoa, uaina, taga fa'atino, ma upu), ina ia mafai e le Agaga,pe a o tatou ulufale atu ile loloto ole

misitelio ole paseka, ona suia vaega uma o tatou olaga, ma atili ai ona tatou ususitai i le Keriso.

22. Ole fa'auau pea ole toe mauaina mai ole matagofie ole Tapuaiga, e le o se sa'iliga o se fa'asologa lelei o sauniga, lea e fa'amalieina pe a tausisi ile fa'atinoina o se faasologa, pe fa'ato'ā fa'amalieina ina ua atoatoa ona fa'atino tulaga manaomia. O le uiga moni o lo'u lagona i lenei mataupu, e le fa'apea ua fa'amaonia ai lona uiga faafeagai, lea e fenumia'i ai le uiga ole faigofie ma le fa'atamala le fa'atuaoia, po ole mea e tatau ona fai ma le mea e fa'afoliga, po o le mausali ole fa'atinoina ole fa'asologa faatasi o se mea ua le mafai ona faataunuuna lelei.

23. E tatau ona tatou manino lelei ile mea lenei: o vaega taitasi uma ole tapuaiga, e tatau ona fa'aautū ile (avanoa, taimi, gaioiga, upu, la'ei, pese, musika..) ma o fa'atonuga uma e tatau lava ona faatino. Ole ato'ato'a olea fa'atinoga ua lava lenā, e puipuia ai le ono lē maua e le aofia ua potopoto ole atoaga e tatau mo i latou, ole patipatia lea ole misitelio ole Paseka, e tusa o le fa'asologa ua uma ona fa'ata'atia e le Ekalesia. Peitai, e tusa po ole a le tulaga e iai le sa'o ole fa'atinoina ole tapuaiga, e le lava lea e mafai ai ona uunaia i tatou ina ia atoatoa lo tatou agaga tapuai.

Ole maofa a'o sauni i le Misitelio ole Paseka: o se vaega taua ole faiga ole tapua'iga.

24. Ana fai e le iloa lo tatou maofa ile lotolotoi ole misitelio ole paseka i totonu ole mausalī o fa'aailoga o sakalameta, semanu e lē mafai ona tatou maua ma ole a poloka ai e tatou le vasa loloto o kalasia e masani ona lofia ai so'o se tapua'iga. O taumafaiga ina ia fa'amamafa se vaega ole tapuaiga, e tusa pe fetau ma talafeagai, e lē lava lena: e fa'apena foi ona le lava le manatu ina ia fa'amamafa ile ogātotonugalemū ole agaga ole tapuaiga. Ole fa'amamafa ile ogatotonugalemū ma le 'auga ole agaga ole tapuaiga, e mafai ona faaititia i se tulaga gaogaoina, pe afai e le aofia ai le fa'aaliga ole misitelio ole fa'a-Kerisiano. Ole feiloa'iga ma le Atua, e le o le fua o galuega a se tagata ogatotonu e to'atasi, o loo sa'ilī'ili ile Atua, ae o se mea ua tuuina mai. E mafai ona o tatou maua le feiloaiga ma le Atua e auala ile mea fou ole Liutinotagata ole Alii lea o loo maua i le Paseka Mulimuli lona taunuuga i lona finagalo ina ia tatou a'ai i lona tino E fa'apefea ona tupu lenei mea ia i tatou, pe afai tatou te tau mamao 'ese mai lenei matagofie?

25. A ou tautala ile maofa ile misitelio ole paseka, o lona uiga, ou te lē o tautala ile tulaga e pei ua masani ai, ole " fa'alogo'aga ole misitelio". O nisi o taimi, ole tasi a lenei tulaga, o loo faataua i manatu ma tuuaiga sese faasaga ile toe fa'atulagaina ma suiga ua faia ile faiga o tapua'iga. O se tulaga fa'anoanoa tele ona ua ave'esea mai le patipatiga ole paseka, ia le fa'alogo'aga ole misitelio. Ole maofa ile ofoofogia lea ou te talanoa atu ai, e le o se mea ua lilofia i le malosi o se mea moni o loo natia, po o se faasologa fa'amisitelio. Ae, ole mea moni lava, ole maofa ile fuafuaga ole fa'aolataga a le Atua, e pei ona fa'aailoa mai ile feau ole paseka a le Alii o Iesu (cf. Efe 1:3-14), ma ole malosi o lea feau ole paseka, o loo fa'aauau ona tatou mauaina ile taimi ole patipatiga o "misitelio" o sakalameta paia. O loo moni pea ma fa'amaoni, ole atoaga ole fa'aailoaina mai o le

paia o sakalameta, o se fa'amanuiaga tele lea e le oo iai le iloa ole tagata, ma ole a faatoa mafai ona maua lona ato'ato'a i aso gata'aga ile taimi ole toe afio mai ole Alii. Peitai, afai ole maofa moni, o lona uiga ole a leai se afaina ile ono fa'auigaina o le isi vaega ole afio ai ole Atua i se tulaga vava lalata nai lo le agaga ole liutinotagata. Afai o suiga ua soloia ai le uiga le manino ole "fa'alogo'aga ole misitelio", o lona uiga la e le o se mea e ono fa'asea ai, ae o se tulaga e lelei. O se mea matagofie, e pei lava ole mea moni, e le masalomia lava le aliai mai ai ole tulaga maofa, ma afai e fuafua ile misitelio ole Atua, ona tupuga mai ai lea ole agaga fa'aeaea ma le fia vivi'i.

26. Ole maofa poo le ofo ole loto o se vaega taua tele ole fa'atinoina o tapuaiga, talu ai ona ole auala lea e iloa e latou e a'afia ai, ia le faatauaina o gaioiga ma le fa'atinoina o vaega ole tapuaiga. O se vaega ofoofogia foi mo i latou e fa'alogoina le malosi poo le paoa o fa'atusa ile saga fa'amautuina ole agaga ma le uiga o le fagasologa o tapuaiga.

Ole mana'oga mo le a'oa'oina lelei o le fa'atinoina o sauniga ma tapua'iga.

27. O lona uiga la, ole fesili tupito lenei: pe fa'apefea ona o tatou toe maua mai le mafai e olaina ai le ato'ato'a ole fa'atinoga ole tapua'iga? O le ute lea o teuteuga ma suiga sa faia e le Fono Tele o taitai ole Ekalesia (Council). Ole lu'itau e matua ogaoga, talu ai ona o tagata i onapo nei, - e le aofia uma ai aganuu - ua leiloa ma mou atu le mafai e fesoota'i ai ma gaioiga taua, e manaomia mo le fa'atinoina o tulaga ma uiga ole tapuaiga.

28. I lenei talutalufou, ua atili ai ona manatu ma lagona e tagata ua leiloa i latou, ile aunoa ma se fa'asinomaga e tasi, ua leai foi ma se taua o iai, ona le manatu mamafa iai, ua matuaoti foi ma nonofo i se olaga le ato'ato'a ua faigata ai ona maua se femalamalama'ī lelei. Ma ua fa'apena ai ona taotaomia i lalo ile mamafa o le avega na tuuina mai ia i tatou ile amataga, ile vaitaimi sa malosi ai le tagata e toatasi ma ona lagona ma talitonuga (lea foi e toe fa'amanatu mai ai faafitauli e mafua mai talitonuga tuai ole fa'atuatua, Pelagian & Gnosticism). E aofia ai foi ma le fete'ena'iga ole natura ole tagata soifua ma lona agaga, ona ole tagata soifua o le agaga ua liutinoina, ma fa'apea ona mafai ai ona manino ma malamalama ile fa'atinoina o galuega ole fa'atuatua.

29. O lenei tulaga moni ole lalolagi o aso nei, ua naunau ai le Ekalesia, lea ua tuufaatasia ile Fono Tele,

TUSI FA'A-APOSETOLO A LE TAMĀ PA'IA FARANISISI

DESIDERIO DESIDERAVI

ina ia a'afia i se feagaiga, e toe fa'amautūina ai lona malamalama ile avea ma sakalameta o Keriso, ole Sulu mo Malo uma (*Lumen gentium*, ma avea ai le ekalesia *matua fa'alologo ile Upu a le Atua Dei Verbum*), ma amanaia ai ma avea ma ana meatotino fiafiaga ma fa'amoemoega (*Gaudium et spes*), o tagata o tatou taimi. E le mafai ona ta vavaeina ma fa'a'ese'ese Fa'avae tetele ole Fono Tele, ma ole mafua'aga foi lea e le o se mea na tupu fa'afuase'i ai lenei taumafaiga tele e pei ona tomanatu iai le Fono Tele Fa'a-Ekiumeni - o se folafola aupito maualuga lea ole tulaga faasinoti i totonu ole Ekalesia, ma lona matagofie ato'ato'a, lea ua vala'auina ai a'u, faatasi ma outou uma ina ia avea ma tausimea – e pei ona amatalia ile fefa'asoa'i e uiga ile Tapua'iga. (*Sacrosanctum Concilium*)

30. Ole tapunia aloaia ai ole vaega e lua ole Fono Tele *Closing the second session of the Council* (Tesima 4, 1963), na saunoa ai lana afioga ia *Sagato Paulo VI* Saint Paul VI e fa'apenei:

“O felafolafoaiga faigata ma lavelave sa feagai ai, ua maua mai ai ni fa'aiuga loloto ma le taua. O lea ua fa'amautuina ma taunuu ai ile fa'ai'uga ia le mataupu e tasi, ole tapua'iga paia. Ole ave ole fa'amuumua i lenei

mataupu nai lo isi mataupu, o se tulaga talafeagai, aua ole tulaga lea ma lona taua ile soifusa ole Ekalesia, ma ole aso, ole a o tatou fa'amamaluina ai ma aloaia faamaumauga uma e tusa ole tapua'iga poo sauniga lotu. Ua olioli ma faafiafiaina o tatou agaga, aua ole tulaga na iai le faasologa o lenei galuega, ua o tatou maua ai le agaga ole ava ma le fa'aaloalo mo ni tiute fai atoa ma mea e faataua ma faamamalu iai. Ole Atua lava e tatau ona fa'amuumua: ole tatalo ia te ia, o lo tatou tiute fai muamua lava lea. Ole tapuaiga ole alamanuia muamua lea ole mafutaga paia ma le Atua, o loo fa'asoa mai ai e le Atua lona soifua ia i tatou. Ole a'oga muamua foi lea, ole ola fa'aleagaga. Ole tapuaiga, ole meaalofa muamua lea e tatau ona tatou ofoina atu i tagata Kerisiano ua tuufaatasia ma i tatou ile fa'atuatua ma le mana o a latou talosaga. O se vala'aina foi lea i tagata soifua uma, ina ia mafai ona sii a'e o latou leo sa le'i lagona muamua, e auala i le tatalo ua fa'amanuina, ma mau tufa'aga ai ile mana fa'afouina e maua pe a o tatou fa'ailoa atu ma alagaina viiga ole Atua ma fa'amoemoega ole loto ole tagata soifua, e auala atu ia Iesu Keriso ma le Agaga Paia”

(E FAIA PEA)

8

GALUEGA A LE AU APOSETOLO (FA'AAUAU MAI LOMIGA TALU AI)

15: 1 – 35 (Faitau muamua le mataupu lea)

O le “Fono” a Ierusalem. O le ekalesia anamua ua fofō le fa'afitauli muamua: e tatau i Tagata o Nu'u'ese ua liliu ona avea ma lutaia?

O fa'amatalaga a le ekalesia anamua i le tali atu ma fa'aleleia lana ulua'i fa'alavelave ua fa'aalia lelei mai ai le maoa'e o Luka o se tusi tala fa'asolopito. Afai sa avea oe ma suli o se komiti ta'ita'i, manatua se taimi ina ua fonu le kulupu e taumafai e fo'ia se fa'afitauli. E le masalomia o lena faiga sa aofia ai le tele o ni fonotaga ma le anoanoa'i o itula fa'atoa maua se maliliega. O le maliliega atoatoa ma le fa'atinoina e mana'omia le tele o itula o fonotaga, finauga ma galuega.

I le fa'atusatusa o le fa'aonaponei ma le poto masani, fuafua le ekalesia taulelea o lo'o i ai lenei taimi ma fa'apefea ia Luka ona fa'amatala lana tali. O le avea ma so'o o Iesu a o Keriso o se vaega lutaia. Se natura la mo Kerisiano lutaia e foafoaina o Tagata mai Nu'u'ese na liliu e faia mea na masani ai o le fa'atinoina o le peritomeina (mo ali'i) ma tauave atoa le 613 tulafono a Mose. E masalomia o latou ua fa'apitoa i le a'oa'oina ma le ola ai o le Torah, e pei o latou na liliu o ni vaega a le itu a le au Farasaio, o le a liliu le va'ai i ai i lena auala. O isi, e ui i lea, e pei o Paulo ma Panapa, sa lava le la'ua poto masani i mea sa faia e le Atua i Tagata o Nu'u'ese, sa talitonuina o se Tagata mai Nu'u'ese e le tatau ona avea ma tagata lutaia ina ia avea ma Kerisiano.

O lona matagofie na mafai e Luka ona aumai se i'uga i lenei fa'afitauli i se faitauga ua na o le lima minute e faitau ai! I le tolusefulu – lima o fuaiupu, na alu sa'o lē na tusia i le autū o le mataupu ma i le fa'amatalaina mai, ua aumai ai se fa'ata'ita'iga o fuafuaga fai a le ekalesia ua fa'amatalaina mai ai le ekalesia i lona lelei atoatoa.

Fuaiupu 1 – 2 ua aumaia le “tulaga o le fesili”: o le au asiasi mai le laumua o Ierusalem na lu'iina le faiga agamalū a le

fa'apopotoga Anitioka (e lē mana'omiaina le peritomeina o al'i'i liliu mai Tagata o Nu'u'ese), ma o Paulo ma Panapa na vave ona tete'e atu i tagata Ieruselema (e ui e le o ta'ua e Luka Peteru i lenei taimi, o le fefinaua'iga atonu o le misa na fa'amatalaina e Paulo lava ia, mo se isi mafua'aga i lo le mau a Luka, i le Kalatia 2: 11 – 14. O le tasi nei o auala o le fa'amatalaga o le fa'aleleiga a le Galuega 15 ma Kalatia 2).

O le maitauina o lenei mataupu e mana'omia ona fa'aleleia i se tulaga maua, o le ekalesia fa'alotoifale na auina atu Paulo, Panapa ma nisi o sulii i Ieruselema. O la latou malaga i Ieruselema sa fa'ailogaina e le toe fa'aleleia o le au so'o ma tala o le fa'aliliuina o Tagata mai Nu'u'ese, le au Farasaio Kerisiano ua toe fa'amausali lo latou tulaga: o Tagata mai Nu'u'ese e tatau ona peritomeina ma usita'ia Tulafono a Mose.

Talu mai le feiloa'iga a le au malaga mai Anitioka ma le "au aposetolo ma le 'au a'oa'o matutua," e le o se fonotaga a tagata uma a le ekalesia ae o se fonotaga a ta'ita'i. E pei o so'o se isi e fa'amaumauina minute a se fonotaga o le a maitauina le fa'aupuga, " i le mae'a ai o fa'atalanoaga" na fa'asao mai ai le anoanoa'i o vaitusi ma pepa a Luka. Ona faia lea e Luka ina ia tula'i Peteru ma toe fa'amatala vaega ua uma ona tatou fa'alogi i ai mai le Galuega 10 ma le 11 ua maitauina o se tala a Konelio ma lona aiga. O le taimi la lenei o upu a Peteru ua fa'ailoa mai ai le fua o lenā poto masani. Ua ia fai mai ua fa'amamāina e le Atua o latou loto i le fa'atuatua, o lo'o fa'asino i le Esekieleu 36: 25 – 26. Ua ia finau mai o le fa'ae'ega pa'ia o le Agaga Pa'ia e le Atua i luga o Tagata mai Nu'u'ese ua fa'aalia mai ai le sau o le fa'aolataga e "ala mai le kalasia a le Ali'i Iesu (v. 11). O le finauga tete'e atu i le polisi Ieruselema o se fa'aupuga ua fa'aoga so'o e Paulo ma Panapa e fa'amatala ai "fa'aailoga ma matagofie na galue ai le Atua i Tagata o Nu'u'ese e ala mai ia i la'ua," na maitauina e le au faitau o se fa'asino i mea na tutupu o lo'o fa'amatala mai le Galuega 13 – 14.

O lona fa'amausalīina, na fa'ate'ia, mai le gutu o lakopo, le ta'ita'i a le ekalesia i Ieruselema, le tasi tatou te manatu e lagolago tele i polisi "o le fa'asao" i le peritomeina o le au liliu mai o Tagata o Nu'u'ese. O lana finauga na va'aia o se fa'aogaina o Tusitusiga Pa'ia i mataupu o lo'o tutupu. E pei ona tatou feiloa'i atu i ai i le lauga a Peteru ma le tasi a Paulo i Pisitia Anitioka. Na maua e lakopo le fa'amausalīina o le tulaga na sulii mai ai Paulo ma Panapa i vaega Eleni a Amosa 9: 11 – 12.

E pei i le mataupu a isi galuega, o le fa'auigaina i'inei e mana'omia ai le tusitusiga Eleni a le perofeta. O le vaega lenei a Amosa 9 o lona uiga o le toe fa'aleleia o Isaraelu. Ae o le tusitusiga Eperu o lo'o i ai le upu edom (Edom - mūmū o Esau le ulumatua ona na fanau mai e mūmū atoa le tino), ae ua faitauina e le fa'aliliu e le Feagaiga Tuai 'adam (tagata), ma ole fa'aupuga e uiga i le fa'ato'ilaloina o se vaega o totoe a Edom na ave'a ma se tasi "o tagata uma" o lo'o sa'ili le Ali'i. E fa'apefea ia lakopo (po'o Luka) ona mauaina i lenei faitauga mai le Tusi Pa'ia Eleni se fa'amausalīina o se tala'iga e lē fa'alavelaveina i Tagata mai Nu'u'ese? O lo'o atagia mai ai le misiona e lua vaega e tutusa ma le au ulua'i fa'apopotoga mai ia Isaia 49: 5 – 6, (1) o le toe fa'aleleia o ituaiga o Isaraelu ("o le fale a Tavita ua pa'ū") ma (le taliaina o Tagata mai Nu'u'ese (le lalolagi atoa)).

O le fa'ai'uga a lakopo o le fa'ailoaina o le tala'iga i Tagata o Nu'u'ese o le finagalo lea o le Atua ma ia fa'apea fo'i ona fa'atutumu se fa'aauuina o le taimi ua tuana'i i le finau atu e tatau ona mauaina mai le au liliu mai Tagata o Nu'u'ese ma sa masani ona mana'omia e Isaraelu mai tagata 'ese ua nofo mau e pei ona fa'amatala mai e le Levitiko 17 – 18. Ona o se fa'aailoga ua latou au atu i se fa'apopotoga ua mau a'a i Isaraelu, o Tagata mai Nu'u'ese ua liliu mai e tatau ona mulimulita'i i tulafono masani mo tagata 'ese ua nofomau ma "ia fa'amamao outou i mea e fasia mo tupua, ma le toto, ma mea titina, ma le faita'aga (29). (E fa'apea fo'i, o se mataupu manino lelei e mafai ona faia fa'apea, o le mataupu lenei e le o lisi o mea'ai a se nofoaga, o le fa' o itema a le fa'atonuga fa'aaposetolo o lo'o fa'asino i amioga ua a'afia i faiga'ai i malumalu fa'apaupau, ma le au talitonu o Tagata mai Nu'u'ese ua lapata'ia ina ia faia ni amataga fou mamā mai nei nofoaga.)

Maitau le fa'amatalaga a'ia'i a Luka o mea e tatau ona fa'atele atu ina ia maua ai se fa'ata'ita'iga e fo'ia ai fa'afitauli ma fa'ai'uga fai a le ekalesia. E tolu vaega e va'ai i ai:

1. Ia faia se talanoaga e aumai ai mea ua masani ai fa'apopotoga i lo latou malamalama'aga i mea o lo'o faia e le Atua ia i latou (e pei o fa'amatalaga a Peteru, Paulo ma Panapa).
2. Taumafai ina ia malamalama o le poto masani e feagai atu ma le fa'apopotoga a le au fa'atuatua e pei ona malamalamaina (i'inei, o le upu na si'i e lakopo mai Eleni Amosa 9).
3. O le faia o se fa'ai'uga fa'apolisi e fa'amausalī ai le ta'ua ua fa'aoso mai e sitepu 1 ma le 2 (o i'inei o le fa'ai'uga e fa'asa'oloto mai o le au liliu o Tagata mai Nu'u'ese mai matafaioi e lē talafeagai, ae mana'omia i latou ina ia tautisi i tulafono Levitiko mo tagata 'ese – po, le isi fa'auigaina, ia taofia le 'au atu so'o i fiafia a malumalu a le au fa'apaupau).

O le faiga lava ia o le fofōina o fa'afitauli o se mea e fa'amatala e le fa'apopotoga lava ia i upu "auā ua lelei i le Agaga Pa'ia ma i matou nei...." (v. 28)....fa'auua pea...

O Evagelia a Mataio ma Luka, ma le Tusi a Isaia, ua ofoina mai ni mea'ai mo la tatou faigamalaga o le Atevetu.

O se matagofie tele ae malamalama i nisi o gagana ua aumaia ni upu mo le lumana'i: E pei o le gagana Italia ua maua mai ai upu e lua: *avvenire* ma le *futuro*. Futuro ua maua mai ai le upu Peretania future (lumana'i) ma i lenā faiga, o le upu Peretania future e mafai ona fa'apea mai o se mea ua tuputupu a'e mai le taimi nei, *avvenire* – e pei o se upu tau aiga 'Advent' ua fa'asino ile taunu'uga po o le 'aga'i mai o se mea po se Tagata o lo'o aga'i mai ia i tatou. *Avvenire* ma le Atevetu ua fausia se manatu o le fa'amoemoega ma le misitelio. O le vaitau lenei ua fa'alatalata mai ai le Atua ia i tatou. Ua afio mai le Atua e fa'amalamalama ma fa'asa'oloto i tatou

O le Tusi o Fa'aaliga ua tautala i le "Ali'i le Atua, o lo'o soifua, na soifua fo'i, o le a afio mai' (Fa'aaliga 1: 8). E lē o fa'amatalaina le Atua i'inei o le tasi o lo'o soifua, na soifua mai ma lē o le a sau – e pei ona fai mai e tutusa i le tuana'i, le taimi nei ma le lumana'i. Ua fa'ailoa mai e le Fa'aaliga le Atua 'Ate-vetu', 'o le a sau' ma o lo'o sau iā i tatou mai le misitelio o le lumana'i.

O le Tusi lava lea o Fa'aaliga ua fa'ai'u i le tatalo 'Le Ali'i e Iesu, ia e afio mai' (22: 20). O la tatou lumana'i o se *Kairos* tele, e lē na o se *chronos* po o se taimi fa'auati e mafai ona tatou fuaina ma pulea. Atevetu o se avanoa fa'apaiaina po o se meaalofoa ua tu'uina mai iā i tatou e le Atua ua sau e fa'amalōlō ma lavea'i i tatou.

O le afio ai o le Atua O taimi uma lava tatou te faitauina ai upu a Mataio e uiga iā Iesu o le 'Emanuelu' po o le 'Atua ma i tatou', ua fa'amanatu mai ia i tatou o le Atua e

lē o mana'o e ola ai lena alofa mai se nofoaga mamao. O Iesu o le va'aiga fa'aletagata lea o le Atua. O lenei tu'uina mai fa'a – mamana ua talitonuina ai le alofa moni a le Atua ma lona a'afiaga. O Iesu o le Atua – na sau – e – fa'atasi ma i tatou. O ia o le Emanuelu ua mana'o e fa'atasi ma i tatou i aso ma taimi uma. Na avea o ia i taimi uma lava o fofoga o le alofa o le Atua ua fa'atasi ma i tatou.

Fa'aolataga mo tagata uma ma mai le Tasitolu

O tomanatunatuga i mataupu amata a Mataio, ua tatou maua i ai le anoanoa'i o mea'ai mo la tatou faigamalaga o le Atevetu. E lua nisi o sini ua vala'uina ai la tatou va'ai. Muamua, mai lava le amataga, ua mana'o Mataio ina ia tatou maitauina e iā Iesu ua tatou fa'atalitali mo se tasi o lē o le a aumaia le tala lelei mo tagata uma – mo tama'ita'i uma ma ali'i uma, fa'apea mo lutaia ma Tagata o Nu'u 'ese. Ua ia aumaia lenā autū i le fuaiupu amata. O ali'i lutaia ua latou u'uina fa'atasi le gafa a le aiga o Iesu, ae e lē tatau ona tatou lē amana'iaina Ruta, Patesipa (le avā a Uria le Heti), ma isi fafine mai Nu'u'ese i le laina a Iesu. O le a sau Iesu e aumai le fa'aolataga i tagata uma lava.

E pei o le tele o le au tala'i o le tala lelei, o Mataio o le a toe fo'i i lana mataupu amata i le fa'ai'uga o lana Evagelia. O i'ina o le Iesu toetū ua auina atu lana tala lelei i tagata uma lava (Mataio 28: 18 – 20).

O le fa'atonuga mulimuli na avatu e Iesu toetu ua a'afia ai fa'atonuga e 'papatiso i le suafa o le Tamā, ma le Alo, ma le Agaga Pa'ia'. O i'inei ua tatou feiloa'i atu ai i le sini lona lua ua fa'apea ona fa'ailoa mai i le amataga o le Evagelia a Mataio: ua fa'aalia le Atua e Iesu o se tasi o le Tasitolu. Ua fai mai Mataio o Iesu na foafoaina e ala i le mana a le Agaga Pa'ia (Mataio

1: 18, 20), ma ona fai mai lea o le fuaiupu mai le perofeta o Hosea e fa'amanatu mai ai i le au faitau e iā Iesu ua tatou va'aia ai le Atua le Alo (Mataio 2: 15). Mai le amataga na fa'aalia e tusi evagelia foliga o le tasitolu o le tala a Iesu.

I le Atevetu, e pei i isi vaitau, ua tatou vi'ia le Tasitolu. Vi'iga i le Tamā mo le auina mai iā i tatou, le mamalu i le Alo, fanau mai ma i tatou o le tama a Maria, ma le mamalu i le Agaga Pa'ia o lē sa fa'aauuina le ola ai o le Alo i le manava o Maria.

O le Evagelia lona Lima

O le a sou manatu i le semina a le Iesu ma la latou tusi, *O le Evagelia lona Lima?* Pe o sa'o 'ea i latou i le tele o fa'amatalaga i le Evagelia fa'aapokalifa a Tomasi?' O na fesili ua ma'imau ai le taimi mai le amataga o le tausaga 1990. Pe sa tatau ona fa'apea atu o le Evagelia lona Lima moni e tatau o le Tusi a Isaia. A uma le Tusi o Salamo, o Isaia ua avea ma Tusi o le Feagaiga Tuai ua sili atu le ta'uta'u e tagata ma fa'aleoina mai e le Feagaiga Fou. O Isaia ua fa'amaonia e loloto le fa'atanoa na asu mai ai e Kerisiano anamua le malamalama'aga fou o le Atua. Ua fa'aauau ona tuputupu a'e lenei malamalama'aga iā ia lava i taimi o le Atevetu ma le Kilisimasi.

O le fa'atinoga o le musika mai ia Handel na fa'alogoia ai le matagofie o tusitusiga mai ia Isaia. Ua tatou fa'alogoia i o tatou taliga ma tatagi i o tatou loto. Ua tatou fa'alogoia 'inā fa'amafanafana atu ia outou i lo'u nu'u ona o vanu uma e fa'aeina ia' ma le 'mamalu a le Ali'i o le a pupula mai' Ona pepese lea o le loto ma tali ua peseina: 'Alu a'e i le mauga maualuga, o oe lē aumaia le tala lelei ia Siona.' Ua tatou sauniuni e fa'alogo i le pese: auā ua fanau mai mo i tatou

le tama, ua foa'iina mai mo i tatou le atali'i'.

O la tatou tatalo o le Atevetu ma tala'iga e mafai ona fa'ateleina e Tusi a Isaia fa'apea Maleko 1, Mataio 1 – 2, Luka 1 – 3, ma Ioane 1. Tatou te fiafia uma i upu a le perofeta e uiga i le tupu lelei o le a sau: o le nu'u sa savavali i le pouliuli, ua latou iloa le malamalama tele. O le a ta'ita'ia i matou e se ta'ita'i atamai e mamana i lona malosi, o lē e fa'aalia lona alofa fa'atamā, ma o le a aumaia le filemū ma le tamāoaiga: e igoa fo'i o ia, o le silisili 'ese, o le Faipule, o le Atua malosi, o le Tamā o le fa'avavau, o le Ali'i o le filemū' (Isaia 9: 2 – 7). O le Poto ma le faimea tonu o le a fa'ailogaina ai le tupu fa'apa'iaina; o le Agaga a le Ali'i o le a i luga o ia. O le a fa'asoa le natura lava ia i le sau o le fealofani ma le filemū fa'atauva'a: "E fai le amiotonu ma fusi o lona sulugatiti, e fai fo'i le fa'amaoni ma fusi o lona tino. E nofo fa'atasi le luko ma le tama'i mamoe, e ta'o'oto fo'i le nameri fa'atasi ma le tama'i 'oti, e fa'atasi fo'i le tama'i povi ma le Leona ta'anoa atoa ma le manu peti, e ta'ita'iina fo'i i latou e le tama itiiti' (Isaia 11: 1 – 9). O nei folafolaga ua olioli i se fa'ataunu'uga o le a sau i le malō na fa'aulufaleina e Iesu. O le a tatou iloina mai iā ia ua tatou iloina ai le folafolaga mo i tatou: 'e maimoa ou mata i le tupu i lona matagofie' (Isaia 33: 17). O le Tusi a Isaia i le tele o taimi, ua fa'amaonia o le Evagelia lona lima aemaise lava le vaitau o le Atevetu. O lana fe'au fa'aleagaga e mafai ona fagagaina o tatou agaga i aso a o aga'i atu i le Kilisimasi ma le Tausaga Fou.

Vivi'i ma Tatalo A o ia aga'i atu i lana Evagelia, na fausia e Luka se lagona o le fa'afetai e lē noatia. Ua ia aumaia fa'atasi i se fa'afoliga tulaga 'ese ni tatalo: mai le Pese a Maria (Luka 1: 46 – 55), Fa'amanuiaga a Sakaria (Luka 1: 68 – 79) ma le pese a agelu (Luka 2: 14), aga'i atu i le tatalo a Simeona (Luka 2: 29 – 32). E leai ma

se isi vaega o le Feagaiga Fou e i ai ni vaega ua tumu i le 'oa i tatalo.

O tatalo a Luka ua fiafia i le vi'ivi'i i le Atua ma le fa'afetaimolia loloto i mea ua tatou talia. Ua latou fa'atulaga maia se leo a se Atevetu mo mea o le a mulimuli mai. O la e pei o fai mai Luka ia i tatou: 'fa'amolemole ia avea nei tatalo o a outou. O le a outou talisapaia le tala atoa o le a talatala mai pe afai tou te fa'atasi atu i le vivi'i ma le fa'afetai i le Atua fa'atasi ma Maria, Sakaria, ma le au agelu. Ma Simiona le toeaina.

O le fa'afetai ma le vivi'i ua si'i ai le lagona o le olioli ma le fiafia. O le iloaitino masani ua fa'ailoa so'o mai se olioli filemū o le tumau i le ulufia ai olaga o latou e masani ona fa'apea atu 'fa'afetai' i le Atua ma ona uso a tagata. I ana mataupu muamua e lua e fai ma toe fo'i mai i tua Luka i le sini o le olioli ma le fiafia, o se aotelega o le fa'afetai ua ia mana'o e fa'afaillele.

O le agelu o Kapeliele na fa'ailoa ia Sakaria le fanau o se atali'i (Ioane le Papatiso), ma fa'amautinoa atu iā te ia: E iā te oe le fiafia ma le olioli; e to'atele fo'i e fiafia i lona fanau mai' (Luka 1: 14). Ina ua sau Maria e asiasi, na fai atu Elisapeta iā te ia: Fa'auta fo'i ua o'o mai le leo o lou alofa i o'u taliga, ona osooso ai lea o le tama i lo'u manava ma le olioli' (Luka 1: 14). Na tali atu Maria i le tatalo: 'ua olioli fo'i lo'u agaga i le Atua lo'u Fa'aola' (Luka 1: 47). O tuā'oi a Elisapeta ua olioli fa'atasi ma ia' i le fanau mai o Ioane (Luka 1: 58). O le fa'atumutumuga o nei fa'aaliga o le olioli ma le fiafia o le a taunu'u pe a fanau mai Iesu lava ia ma o le agelu a le Ali'i ua folafolaina i leoleo mamoe lenei 'tala lelei o le olioli tele' (Luka 2: 10).

A tatou vivi'i, fa'afetai ma fa'amamalu le Atua mo mea uma ua sau iā i tatou e ala mai iā Iesu ma lona fanau mai, o tatou fo'i o le a mautinoa lava ona lagonaina le fiafia, e o'o lava i se olioli e lē mafai ona

fa'amatalaina. Aiseā e le faia ai se fa'ata'ita'iga fa'aleagaga i lenei Atevetu? Taumafai e toe vivi'i ma fa'afetai tele atu i le Atua, ma va'ai po o le a sou fa'alogo'aga.

Fa'alologo e Loloto E masani o latou e fa'afetai so'o i le Atua ua fa'amaonia o latou o ni tagata e loloto le fa'alogo. O lē ua maualuga lana fa'alogo i le mataupu muamua a Luka o le Taupou Pa'ia lava ia. Sa fa'alogo e ala ia Kapeliele le fe'au mai le Atua i le fa'aaliga ma tali atu "Fa'auta, o a'u nei o le 'au'auna a le Ali'i; ia faia iā te a'u e tusa ma lau fetalaiga." (Luka 1: 38). Mulimuli ane na fa'apa'iaina o ia e Elisapeta ona o lona fa'alogo ma le taliaina o folafolaga a le Atua: "E manuia fo'i le fafine e talitonu, e taunu'u mea ua fetalai mai ai le Ali'i iā te ia" (Luka 1: 45). O lo'o fa'aalia mai fo'i e Luka Maria o se tasi e fa'alogo i isi tagata. Ina ua uma ona ta'u atu e leoleo mamoe mea uma na latou fa'alogo ai i agelu, o Maria ua taofi ia upu uma, ua mafaufau ai i lona loto' (Luka 2: 19).

Ua vala'auina i tatou e le Atevetu ina ia faia le fa'alologo loloto. Ua vala'auina i tatou e le Atevetu e sa'ili ma fa'aleleia atili auala ua tatou fa'alogo ai i isi ma fa'atamaoigaina o latou olaga. E ala ile perofeta o Isaia, na fai atu le Atua i le au fa'aunu'u a i Papelonía: 'Aua tou te manatua mea na muamua, 'aua fo'i le mafaufau i mea anamua. Fa'auta ou te faia se mea e fa'atoā iloa' (Isaia 43: 18 – 19). Mo tatou i le asō, ua fai mai le Atua: "Aua tou te manatua mea na muamua, 'aua fo'i le mafaufau i mea anamua. Fa'auta ou te faia se mea fa'atoā iloa". O lenei lava Atevetu, o lo'o i ai le Atua i le fa'atinoga o le faia o tagata fou iā i tatou ta'ito'atasi.

O LE AU PA'IA (1ST. NOVEMA)

I le aso o le sulufaga a le au Pa'ia tatou te manatua ai le au Kerisiano ta'uta'ua uma ua tuana'i o lo'o olioli e fa'avavau i le lagi, seleseleina le tau i o a latou galuega lelei sa fai i lenei lalolagi. O agaga le mafaitaulia nei o lo'o i le lagi e le'i fa'apa'iaina o ni sagata/sagato ma e lē o i ni fa'amaumauga aloa'ia a le Ekalesia. E lē to'atele nisi e iloaina i latou nei ae e telē le a'afiaga o latou olaga i galuega lelei sa latou faia. E to'atele sa ola ai i se olaga e lē manino ma iloaina, maliliu ma le lē iloa ma ua galo atu. O a latou olaga e lē o fa'ailogaina i ni mea maoa'e na tutupu, po oni mea na latou ausia e ta'ua ua fa'amaumauina, ae sa latou ola ai i mafatiaga uma lava ma fa'amasinoina i faiga uma i aso ta'itasi. Sa o'o i ai le vaivai e pei ona tatou vaivai, fa'aosoosoina e pei ona fa'aosoosoina i tatou ma a pa'u'ū i le agasala e toe tutū i luga ma faia le fa'aleleiga ma le Atua. O le auala sa ola ai o latou olaga sa sili le ta'ua i lo le lauiloa sa latou ausia.

O le manatu ua lauiloa ua mamao atu ai le pa'iaga ma i tatou. Mo le to'atele o tagata ua manatu sesē o le avefa ma tagata pa'ia o ni faiga e lē ausia e i latou. Mo i latou o tagata pa'ia o ni ituaiga e 'ese, o ni tagata e lē agasala i o latou olaga atoa ma e lē iloaina le faia o mea le tonu. Ua galo iā i latou o le avefa ma tagata pa'ia o se tauiviga i le olaga atoa ma e umi. Ua fai mai Iesu iā i tatou o le tagata lelei ua sauniuni e tauave faigatā, ave'ese le alofa fa'apito iā ia lava ma suia ona ala.

Pa'iaga ua ausia i le faia o mea masani i le fa'amaoni. O le mea ua fa'atumulia ai i tatou i le fiafia tele i le lotolotoi ai i le anoanoa'i o nei sagato/sagata o tagata mai iā tatou tuā'oi ma aiga ma si'osi'omaga sa tatou fa'asoa fa'atasi, se'ia talu ai nei sa ola fa'atasi ma i tatou. O a latou olaga ua fa'aosofiaina tele ai i tatou ona sa iā i latou le malosia tele e ola ai le fe'au a le evagelia i faiga masani ma le loto gatasi. O le fa'ata'ita'iga tele la o latou lelei e lē o fa'amaimaua iā i tatou. O le tomanatunatu i la latou manumalo ua maua ai le loto tele e tau ai le taua lelei i tatalo, togisala, onosa'i ma galuega lelei o le alofa. O la tatou tatalo ina ia fa'aulufale o tatou olaga e le Atua ma faia lona nofoaga iā i tatou ina i ai se aso e tu'u fa'atasia ai i tatou ma i latou

O Lo Tatou Ali'i o Iesu le Tupu, o le Tupu Aoa (20 Novema)

O le evagelia o le sulufaga lenei ua fa'amanatu mai iā i tatou le muta'aga o le taimi i le tosigaga o la tatou va'ai i taimi mulimuli o le olaga fa'alalolagi nei a Keriso. Sa fa'akoluseina i luga o le koluse i le va o tagata gāoi e to'alua, ona ua fai mai o ia o le tupu, ae o le pale na fa'apaleina ai o ia ua teuteuina i mea matuitui. I luga a'e o lona ulu na tusia ai upu nei, 'Iesu o Nasareta, le Tupu o tagata lutaia.' Na o lona tinā o Maria ma nai fa'auō sa tumau le fa'atuatuaga i le i'uga. I le taimi o ona tigā tele fa'aletagata sa ia talia le salamō a le gaioi lelei ma avatu i ai lana fa'amautinoaga ma le fa'amausalī o le ola e fa'avavau. 'O le asō ta te fa'atasi ai ma oe i parataiso.'

O tupu o le lalolagi nei e fa'atino a latou pule mai i maota o tupu, o Keriso le Tupu ua fai o ia ma Tupu mai luga o le koluse. O lona malō e lē o se nofoaga ae o tagata ua avatu o latou loto ma le alofa iā te ia i le fa'atonutonuina o latou olaga e pei ona ia finagalo i ai. O mea uma ua lelei ma si'itia i o tatou natura fa'aletagata ua tafe mai Kalevalio le mea na avefa ai o ia ma Fa'aola ole lalolagi ma manumalo mo i tatou i le olioli e fa'avavau ma le Atua. O lona maliu i luga o le koluse o la tatou pou fa'ailoga lea i le lagi ma le auala e mulimulita'i pe afai tatou te faia se uiga i o tatou olaga ma tatala atu le va'ai i se lalolagi fou.

Mo nisi o tatou ua lē toe iloaina le moni o le lagi o la tatou taunu'uga mulimuli, o le sulufaga o Keriso le Tupu ua vala'auina i tatou e amata ona olaina o tatou olaga e pei ona a'oa'oina mai e Iesu e ola ai. I mea uma ua tatou faia tatou te sa'ili ina ia ola e pei o Keriso, ona na avefa lea o ia ma o tatou tupu pe afai tatou te fa'amaoni iā te ia. I le fa'atinoga e masani ona tatou taofiofi i lenā fa'amaoni. E to'afia i tatou e mafai ona fai mai ma le fa'amaoni o le olaga fa'aleleiga ia Keriso o le fa'aululuga o a tatou aiga, o le malō e lē va'aia i mea'ai uma ma lē e fa'alogoga ma le leai o se leo iā tatou talanoaga uma. Ina ia maitauina Keriso o le tupu o tatou olaga o lona uiga o se suiga o le loto, e pei o le gaioi lelei, ma o se faiga fa'amaoni i o tatou auala e ola ai. O ni filifiliga e tatau ona faia e tatou e uiga i le tu'ua o auala pupu'u ua tatou masani ai i o tatou olaga i aso uma ma isi. Manatu fa'apito, inoino ma le leai o se faimeatonu e tatau ona fa'aulufale maia uiga fa'a-Keriso pe afai tatou te mulimuli i lana fe'au.

O le tulaga tau tupu o Keriso ua faia moni i le tu'uina atu i le Atua e faia lana galuega iā i tatou ma ala iā i tatou. O se faiga mo le olaga atoa e a'afia ai le vala'auina i aso ta'itasi mo se talanoaga. Ua ia vala'auina i tatou, o ona tagata, e 'au atu ma ia ile tauiviga mo le tuputupu a'e o lona malō.

Aso Sa Muamua o le Atevetu

O le tausaga fou fa'alelotu ua fa'aulufale mai fa'atasi ma le vaitau o le Atevetu. O se taimi mo sauniuniga fa'aleagaga mo le Kilisimasi – le sulufaga ua tatou patipatia ai le fanau mai o Keriso ma le amataga o la tatou fa'aolataga. O se taimi lenei fa'apitoa lona fa'apa'iaga e le Atua ua vala'auina i tatou ina ia mātāala ma sauniuni i le fa'amoemoe fiafia mo le sau o lo tatou Fa'aola, Iesu Keriso. O le Atevetu o se vala'aulia ina ia fa'afou o tatou taumauga Kerisiano ma amata ona ola ai le olaga i le ulua'i sau o Keriso i le 2,000 tausaga talu ai, na mafai ai ona faia ina ia tapena ai mo lona sau mulimuli i le i'uga o le taimi. O le moni o le ola ai i lenei lalolagi o mea uma lava o le a i'u ona uma.

Afai o le uiga moni o le Kilisimasi ina ia taofiofi pea i o tatou mafaufau, se filifiliga manino e tatau ona faia ina ia ulufale atu ai i le agaga tonu o le Atevetu. I le amataga o lenei vaitau o se vala'au ina ia liliu ua fa'ailoa mai ia i tatou uma ona e mana'o le Atua ina ia tatou ola latalata ia te ia ma fa'alogoina le mafanafana loloto o lona alofa. Tatou te faia lenei i le tatala atu o tatou loto e talia lona Alo o Iesu Keriso i o tatou olaga. O lona i ai e mafai ona tatou iloina i tagata tatou te feiloa'i atu i ai ma tulaga ua aga'i mai ai iā i tatou i aso ta'itasi. O lo'o i ai o ia ina ia fa'aulufale mai tagata matitiva ma latou ua i ai le mana'omia. Ae ui i lea, afai e faia e le Atua lana galuega ia i tatou e tatau iā i tatou ona muamua ave'ese fa'afitauli ua taofiofia ai lona fanau mai i o tatou agaga. So'o se amioga e lē talafeagai ma o tatou o Kerisiano vala'auina e i ai le mana'oga e lia'i 'ese. Ua tatou avatu ile Atua le auala i o tatou olaga pe a tatou fa'aautafa mea fa'alalolagi nei ua aumaia le fa'amoemoe ma le lēlavā i o tatou loto. O le lafoa'i o faiga a le pogisā ua tatou maua ai le avanoa e ola ai i le malamalama a le evagelia.

Ae pagā lea ona o le natura a le tagata e masani ona filifilia le ala e leai se te'ena, o le to'atele o i tatou o le a uia le Atevetu e aunoa ma le mauaina o mea e mana'o ai le Atua tatou te faia i o tatou olaga e ala atu ia Iesu. O a tatou mafaufauga e masani ona fa'aautū i mea fa'alalolagi nei a le Kilisimasi ona o a tatou manatu ua tu'itu'i e le ilaila ma le susulu o fa'atosiga fa'apisinisi ua fa'amalosī'au ai i tatou i le mana'o tele ma le manatu fa'apito ia i tatou lava. O le Alo o le Atua e fa'avavau ua sa'ili e ulufale iā i tatou ina ia tatou fa'asoa i lona olaga. Ua ia tu ile faitoto'a ma tu'itu'i ae e lē sau i totonu pe a lē vala'auliaina. O la tatou avanoa lenei e fa'aulufale mai ai o ia ma fa'aleleia la tatou faigamalaga fa'aleagaga i le savali i le malamalama a le Ali'i.

PHOTO GALLERY



FAITAUGA MO LE MASINA O NOVEMA 2022

ASO 6 NOVEMA—ASO SA 32—TAUSAGA MASANI

Faitauga 1:	2 Makapaio 7: 1 – 2, 9 – 14.	Matua: O le tupu o le lalolagi na te toe fa'atū i matou i le toe tu o le ola e fa'avavau.
Salamo:	17: 1 (tali), 5 – 6 (tali), 8, 15 (tali).	Tali: Ou te malie pe a a'u ala ua foliga iā te oe.
Faitauga 2:	2 Tesalonia: 2: 16 – 17; 3: 1 – 5.	Matua: la fa'atumaina outou i galuega lelei uma ma upu lelei uma.
Aleluia, Aleluia...	la outou mataala e lē aunoa ma tatalo ina ia tutū i luma o le Ali'i o le tagata ...Aleluia.	
Evagelia:	Luka 20: 27 – 38.	Matua: E lē o le Atua ia o e ua oti, a o e ola.

Tofitofiga O le Upu:

O Le Toetu ma le Mafutaga a Tagata Pa'ia

“E lē o le Atua ia o e ua oti, a o e ola” (Luka 20: 38)

O le itulagi i luga o Novema o tu masani e o fa'atasi ma i latou ua maliliu. Ua mamago fua o la'au, ma laula'au ua mamago ma to'ulu, ma le mutia ua lē o toe tupu. O le fou o le tuputupua'e (spring) ma le mafana o le taumafanafana o ni manatu ua mamao lava. Ae i le ogatotonu o nei fa'ailoga o le maliu o lo'o i ai se fa'amoemoega o le ta'amilosaga a le natura o le a toe amata ma o le fa'amoemoega o nai masina i luma o le a tatou patipatia le toetu o Iesu i le Eseta.

O faitauga mai le Tusi Pa'ia o le asō ua fa'atatau i o tatou fa'amoemoega i le toetu. Salāmo 17 o se fa'anefu masani e uiga i lenei mataupu ua tatou mauaina mai Salāmo ma ulua'i vaega o le Feagaiga Tuai. Ona o latou na ulua'i tusia le tusi pa'ia o le nofoaga a le au maliliu o le tu'ugamau, o se nofoaga e apolo-gia, e fa'agaloina ai le lagi po ifeli. I le seneturi lona lua i luma atu o Keriso na alia'i mai ai i Isaraelu, e pei ona fa'ailoa mai e le tusi a Tanielu, se fa'amoemoega olaola mo le toetu, fa'amasino ma-mana ma le tau ma fa'asalaga mulimuli mai le oti. O nei fa'amoemoega ua atagia mai le Poto 3 (o se faitauga e masani i le tele o falelauasiga Katoliko), o nisi o tusitusiga lutaia ma le filifiliga o le asō mai le 2 Makapaio 7. Sa i ai se fafine ma lana fanau e to'afitu tama sa te'ea le una'iga leaga a le tupu e fa'afitia le talitonuga lutaia, ma na latou apili i lo latou talitinoga i le toetū mai o le tino ma tau tatau ma le fa'asalaga mai le Atua.

O le faitauga o lenei aso Sa mai ia Luka 20 o se “tala o le finauga” na finau ai Iesu ma nisi o le au Satukaio e uiga i le toetu. I lenei mataupu sa tutū fa'atasi ai Iesu ma le au Farasaio (le au tete'e malosi i le toetu). E tatou te masalomia o le au Satukaio ua iloaina manatu a Iesu i lea mataupu ma ua taulamalama e mai-leia o ia i le fa'apea mai o le talitonuga i le toetu e lē fa'atusi pa'ia ma e lē talafeagai. Ona ua latou talia na o tusi e lima a le Tusi Pa'ia Eperu o se fa'atonuga, ma o le molimau mo le toetu mo latou e la'ititi, o le au Satukaio sa taofiofi i le talitonuga i le toetu e lē fa'atusi pa'ia. Ina ia fa'ailoa lona fa'avalevlea, sa latou tu'uina atu se manatu e fa'avae i le Teuteranome 25: 5 – 10, o lo'o fa'apea mai a maliu se ali'i ma tu'ua se fafine e leai se fanau, o lona uso e tatau ona fa'aipoipo atu i ai. Sa latou fausia se mataupu fa'apea e toafitu le au uso sa auauai i le fa'aipoipo atu i lenei fafine. O nei au uso na maliliu uma, ma na i'u na maliu le fafine. Na fesili atu le au Satukaio ia Iesu po ai o le aveva ma tane a lenei fafine i le toetu mai?

I le fa'aogaina o le faiga fa'afinauga o ona taimi, sa finau atu Iesu i le au Satukaio sa le malamalama i le natura o le toetu ma Tusi-tusiga Pa'ia. Sa ia finau i le toetu o le a aveva i tatou ma fanau a le Atua atoatoa ma o tatou olaga o le a 'ese mai le olaga fa'alalolagi nei ma e lē mana'omia ona toe mulimulita'i i ona tulaga. Ina ia fa'aalia o le toetu o le fa'atusi pa'ia (e o'o lava i le fa'apenetetuka), sa ta'ua e Iesu le Esoto 3: 6 ma le 3: 15 – 16, o lo'o fa'ailoa mai ai e le Atua o ia lava o le Atua a Aperamo, Isa'ako ma lakopo. O le manatu i lenei finauga afai e fa'aalia o ia lava ia Mose ua fa'ailoa mai e le Atua o ia o le Atua o nei pa-teliaka ua maliliu, ona fa'apea lea o la lava e soifua i latou ma o le Atua o Isaraelu o le Atua o latou o lo'o soifua lava. Ma mo tatou i le asō o lenei finauga fa'atusi pa'ia e foliga mai e lē fa'afoliga mai e moni, sa masalomia na malamalamaina ma na talitonuina e tagata lutaia i le taimi o Iesu.

I tua atu o nei finauga le fa'amausalina a Iesu o le Atua a le Tusi Pa'ia o le Atua o le ola, ma o le toetu ua fa'avae lea i le natura o le mealofa a le Atua mo tatou. E lē o se aitalafu ia i tatou e o tatou natura fa'aletagata. O lo'o fa'avae i le natura o le Atua, o lē o le Atua o le ola. O le leai o se fa'asino i le toetu o Keriso lava ia i nei faitauga ua ta'u maia o lo tatou fa'alogi i le leo o le Iesu fa'alalolagi nei i lenei mataupu, ma e le na o se talitonuga i le ekalesia fa'alalolagi nei.

I le masina o Novema ua tatou manatuaina ai i latou ua maliliu. I le faia o lea e i ai lava le fa'anoanoaga, leiloa ma le tu'ua. Ae i tua atu o nei fa'alogi'aga moni o lo'o i ai le fa'amoemoega o le a tatou toe va'ai iā i latou ua tu'ua lenei lalolagi i le toetu mai le oti ma o lo'o tatou i ai pea i le feso'ota'iga ma i latou. O le faitauga mai le asō mai le 2 Tesalonia ua fa'amanatu mai ai ia i tatou la tatou au ai i le fa'apopotoga o sagato. O i'ina ua tatou 'au ai i le olaga ole Atua ma le au pa'ia uma, o tagata pa'ia uma ua muamua atu ia i tatou ma latou uma ua fusifusia fa'atasi i tatou e le fa'atuatua. Ua fa'amantu mai e Paulo ia i tatou o le Atua ua muamua alofa ia i tatou, aumai le fa'amalosia'au ma le fa'amoemoega e ala mai i lona alofa mamana ma o le a puipuia ma fa'amalosia'au iā tatou tauiviga. O le kominio a le au pa'ia e fa'amamua o le galuega a le Atua. O le au pa'ia ua muamua atu ia i tatou ua a'afia ai e le gata o ni tagata ta'uta'ua e pei o Paulo ma le au sagatao fa'apa'iaina ae fa'apea le “pa'ia” na fuafuaina o tatou olaga i o latou fa'atuatua, fa'ata'ita'iga ma le fa'amalosia'au. Ma e i ai le isi i lenei lalolagi. E pei ona fai mai Paulo, lagoonosua, fa'amalosia'au ma tatalo mo le tasi ma le isi o ni noataga e ta'ua mo latou o lo'o i le kominio a le au pa'ia.

FAITAUGA MO LE MASINA O NOVEMA 2022

ASO 13 NOVEMA—ASO SA 33 TAUSAGA MASANI

Faitauga 1: Malaki 3: 19 – 20: Matua: E alu a'e iā te outou le La o le amiotonu.

Salamo: 98: 5 – 6 (tali), 7 – 8 (tali), 9 (tali): Tali: O lo'o afio mai le Ali'i e fa'amasino le atu laulaula ma le amiotonu

Faitauga 2: 2 Tesalonia 3: 7 – 12: Matua: Afai e lē fia galue se tasi, 'a'ua ne'i 'ai fo'i o ia.

Aleluia, Aleluia...*la e fa'amaoni se'ia o'o i le oti, ona 'ou avatu ai lea iā te oe o le pale o le ola ...* Aleluia.

Evagelia: Luka 21: 5 – 19: Matua: O lo outou onosa'i tou te maua ai lo outou ola.



Tofitofiga O le Upu:

Tutumau ma le Pa'iaga

Mai lea taimi i lea taimi o le a valo'ia e se tasi o le a uma le lalolagi i lea aso ma lea aso. O nei valo'aga e masani ona feiloa'i atu i le filogia o le mata'u, tauemuga ma fa'afiafiaga. I taimi o le Feagaiga Fou e tele tagata na foliga mai ua popole, a lē o le gata'aga o le lalolagi, ona fa'apea lea o le a taunu'u mai ma le mata'ina o le malō a le Atua ma se tulaga fou atoatoa o le a sau fa'atasi mai ai.

O le faitauga mai le Feagaiga Tuai i le asō e mafai ona fesoasaoni ia i tatou e maua mai ai se manatu o nei fa'amoemoega. Salamo 98, na tusia i le amataga mo le patipatia fa'asauniga o le malō o le Atua i le Malumalu i Ierusalem, ua malamalamaina o se perofetaga o le fa'alavelave mata'ina a le Atua i le tala'aga a le tagata ma le fa'avaeina o se malō amiotonu mo tagata uma. E fa'apea fo'i, i le Malaki 3 o ulua'i motifiga fa'atusi pa'ia o "le aso a le Ali'i" ua atagia mai i ni fa'atusa mata'iga ("mumū e pei o se ogaumu") ma e fa'apea ona aumaia le fa'aleagaina i le lumana'i o latou e faia mea leaga ma le au femitai. E lē gata i lea o le fa'amatalaina a'ia'i ma va'aiga uiga 'ese o le sau o le malō o le Atua e mafai ona maua i tusitusiga fa'aapokalifa luitaia ma i Evagelia Sinopi.

O le filifiliga o le asō mai ia Luka 21 ua fa'auma ile fuaiupu ua na o Luka e maua i ai lea vaega o le lauga fa'aapokalifa, "O lo outou onosa'i tou te maua ai lo outou ola." O le upu onosa'i o nisi o taimi ua fa'auigaina "tūtūmau" po "tu'uina atu." E le o ni vituti lauiloa i le 21 seneturi i isi atunu'u. I nei ona po ua tatou manana'o i ta'avale saosaoa, e a'ai i mea'ai fa'atau mai ua uma ona fa'avela ma telefoni mananaia. O a tatou āga fa'amata'itū e pupu'u; ma o nei aso ua tatou feso'ota'i i ni auala e lē leoa, o i – meli ma fe'au fa'atafa'i lagi. O le ituaiga o onosa'i ua fautuaina e le Evagelia o le asō, e ui i lea, e lē o le lē fa'alogo po o le fa'apaiē po o le matamuli. I le va'aiga fa'atusi pa'ia o le onosa'i o lo'o i ai le elemene o le to'aga e tete'e atu i foliga i le itū agai. O lo'o fa'aosofiaina e le loto tele ma le fa'amoemoe i le Atua. Fa'amoemoe ma onosa'i o itū ia e lua e tutusa a le tupe. Fa'amoemoe e aunoa ma le onosa'i o le popole vale ma e muta i le fa'avaleva-lea. Onosa'i e aunoa ma le fa'amoemoe e tata'iina i le musuā, taliaina e lē aunoa ma le galuega ma le fa'atauva'a.

Ona o tatou o ni Kerisiano tatou te fa'amoemoe mo le toe sau atoatoa o le malo o le Atua, le toetu o latou ua maliliu, le fa'amasinoga mulimuli ma tau'i ma fa'asalaga tatau. Tatou te

manatu o nei mea uma o le a sau i le taimi ma auala ua fufuaina e le Atua. A o le taimi nei tatou te taumafai e fa'atonutonu o tatou olaga o ni tagata o le fa'atuatua, fa'amoemoe ma le alofa, iloaina atoatoa le vaivai o le olaga o le tagata ma le lalolagi o lo'o si'osi'omia ai i tatou. I le ogatotonu o nei suiga saosaoa tele, tatou te mana'omia le ituaiga o onosa'i tūtūmau fa'atusi pa'ia e ola ai i aso ta'itasi, sapai mai le taimi ua i ai ma ola ai i lona atoaga, i lena lava taimi a o aga'i i luma i le fa'amoemoe i le ola e fa'avavau i le malo o le Atua.

I le 2 Tesalonia e foliga mai sa tautala atu Paulo i fa'apopotoga Kerisiano talavou ua mana'omia ona fa'alogi i le fea'u fa'atusi pa'ia i le onosa'i ma le tūtūmau. O nisi o Kerisiano i Tesalonia i Eleni sa talitonuina o le malō o le Atua ua lata ona sau. Atonu sa ta'ita'i eseina e ituaiga o perofeta sesē o lo'o lapata'ia mai i le Luka 21 pe o'o lava i le lē malamalamaina o le tala a Paulo e uiga i le malō o le Atua. O la latou talitonuga e uiga i le tupu i le malō a le Atua na ta'ita'ia ai i latou e tu'ulafoaina a latou matafai-oi i fa'apopotoga ma taofia a latou galuega ina ia lagolagoina i latou lava ma a latou aiga.

I lenei tusitusiga ua apili Paulo i ona lava fa'ata'ita'iga. E ui ona o se aposetolo, sa i ai lava le aiā tatau a Paulo i le lagolago mai o lana ia lava fa'apopotoga Kerisiano i mea tau tupe ae sa musu e taliaina. Ae sa finau atu e lagolago iā ia o se tagata fai fale 'ie po se tagata faigaluega i mea e fau mai pa'u o manu. Sa ia faia fa'apea ina ia fa'amaonia ai le moni o lana 'au'aunaga. Sa va'ai Paulo iā ia lava o se aposetolo na auina mai e le Keriso toetū e folafolaina le tala lelei iā i latou e le'i fa'alogi i ai muamua. I ana fa'ata'ita'iga sa mana'o Paulo e fa'ailoa atu o ana fa'amoemoega e mamā ma e lē o faia ona o le mana'o i ni tupe po se lelei o ia lava. Na foliga mai sa fa'aogaina so'o e Paulo le tusi o ana galuega o se avanoa e fa'asalalau atu ai le Evagelia. I aso i luma atu o leitiō fa'asalalau, o tagata sa galulue i galuega mamafa sa masani ona fa'afiafiaina i latou lava i le lauga atu i isi. Na mauaina e Paulo i lana tusi galue e lē gata o le avanoa e lagolago ai i lana 'au'aunaga ae fa'apea o se avanoa e tala'i atu ai lona talitonuga i upu ma amioga i ona uso faigaluega. I lona tūtūmau na mauaina ai e Paulo auala e tala'i atu ai le tala lelei e uiga ia Iesu ma avatu le vi'iga i le Atua.

FAITAUGA MO LE MASINA O NOVEMA 2022

ASO 20 NOVEMA—ASO SĀ IESU LE TUPU

Faitauga 1:	2 Samuelu 5: 1 – 3:	Matua:	Ua latou fa'au'u ia Tavita e fai ma tupu iā Isaraelu.
Salamo:	122: 1 – 2 (tali), 3 – 4 (tali), 5 (tali):	Tali:	Na ou fiafia ina ua latou fai mai iā te a'i i tatou te o i le fale o le Ali'i.
Faitauga 2:	Kolose 1: 11 – 20:	Matua:	Ua na aumaia i tatou i le mālō o lona Alo pele.
Aleluia, Aleluia...	<i>la manuia le afio mai i le suafa o le Ali'i; ia manuia le mālō ua o'o mai i lo tatou tamā o Tavita ...Aleluia.</i>		
Evagelia:	Luka 23: 35 – 43:	Matua:	Iesu e, ia e manatua mai a'u, pe a e afio mai i lou mālō.

Tofitofiga O le Upu: O A'a o le Fa'aleagaga Kerisiano - O le Mamalu o lo Tatou Ali'i Iesu Keriso le Tupu

O i luga atu o ia o lo'o i ai se tusitusiga e fa'apea: 'O LE TUPU LENEI O TAGATA IUTAIA' (Luka 23: 38)

Ua avea ma aganu'u le patipatia o le sulufaga o Keriso le Tupu i le aso Sa mulimuli a le tausaga fa'alelotu. O la tatou ta'ita'iga masani i taimi o le tausaga ua tuana'i o Luka, o se atamai i le fa'aleagaga Kerisiano. Ua tatou aofia le tele o mataupu e fa'ata-tau i le fa'aleagaga Kerisiano ma tu'u i latou i le va'aiga i fa'amatalaga a Luka e uiga ia Iesu. O le patipatia o Iesu le Tupu i le asō ua fesoasoani e fa'amausalī le fa'ava'a o a tatou fa'aleagaga: le Feagaiga Tuai, le misitelio o le koluse ma le taūa o le ola, maliu ma le toetu a Iesu.

O le fa'aleagaga Kerisiano o lo'o mau'a i folafolaga a le Atua ia Isaraelu o ona tagata. O le faitauga o le asō mai le 2 Samuelu 5 ua fa'amatala ai pe fa'apefea ia Tavita, le tua'ā a Iesu, na avea ma tupu i Isaraelu anamua. I le Feagaiga Fou ua masani ona fa'amatalaina Iesu o le Alo o Tavita, le Mesia ma le Leoleo Mamo'e a tagata o le Atua. O le mea ua tatou ta'ua o le Feagaiga Tuai ua aumaia le gagana ma le manatu e malamalamaina ai Iesu. O la tatou fa'aleagaga ua fa'avae lea i le filifiliga o Isaraelu e le Atua ma le matafai o Iesu o lē na fa'ataunu'uina folafolaga a le Atua.

O le fa'aleagaga Kerisiano o lo'o mau'a i le misitelio a le koluse. Fa'atasi ai ma ona uiga fa'atauva'a ma le ma'ale'ale, o Luka i lana Evagelia atoa ua fa'aalia maia i le tele o taimi le atamai o Iesu ma fa'ata'ita'iga lelei sa ia aumaia. I le faitauga o le asō ua fa'asagatau mai iā i tatou le misitelio o le koluse.

O tusitusiga i luga o le koluse, 'O le Tupu Lenei a Tagata Iutaia,' o se fa'aupuga ua atagia mai ai le lauiloa o manatu Iutaia e uiga i le tagata o Iesu o le Mesia o Isaraelu. Sa fuafuaina lelei e le au Roma e fa'aleagaina. Mo i latou o Iesu ua na o se isi tala'i talitonuga fa'atupu fa'alavelave, e tatau ona faia vave i ai se i'uga ma se fa'atigaiga. O uigā fa'alua o Luka ma isi Kerisiano anamua o lenā suafa e sa'o, ona o le tulaga tau tupu a Iesu sa fa'aalia lelei atoatoa i lona puapuagā ma lona maliu i luga o le koluse. O lona uiga o le fa'aleagaga Kerisiano e le mafai ona 'alo 'ese mai le moni o puapuagā ma le maliu. e le gata i lea e o'o lava i luga o le koluse na fa'aauu lava e Iesu lana 'au'aunaga o le 'a'apa atu ia i latou o lo'o i le taufa'asi'usi'u ina ua ia folafola i le "gaii lelei" se nofoaga i le mālō o le Atua. O lona uiga o le fa'aleagaga Kerisiano e tatau ona i ai se fua fa'asosaiete ma tatala atu i ituaiga o tagata uma.

O le fa'aleagaga Kerisiano o lo'o mau'a i le lavea'i taūa o le ola, maliu ma le toetu o Iesu (le misitelio fa'apaseka). O lenei mataupu ua fa'amatala lelei i le pese a Kerisiano anamua o lo'o fa'asaina i le Kolose 1: 15 – 20. O le pese ua patipatia ai Iesu o se Atamai a le Atua, e muamua mai i le fa'asologa o foafoaga ma le fa'asa'olotoina ma o se tasi sa fa'aleleia mea uma i le Atua i le "toto o lana koluse."

O le vaega muamua a le pese a Kolose ua aumaia Iesu o le ulumatua i le fa'asologa ole foafoaga. Ua fa'aalia mai ai Keriso sa i ai i le taimi o le foafoaga ma o le "fa'atusa o le Atua e lē va'aia, le ulua'i fanau mai o foafoaga uma." O le fa'atagataina o le Poto o se manatu teuteuina iloga i nisi o tusitusiga a le Feagaiga Tuai (Fa'ataoto 8, Sirako 24, Poto 7), ma e tele masalosologa iā i latou e uiga o ai po le a le Poto ma o fea o nofo ai. E pei ona fa'aalia mai e le Kolose 1, o Kerisiano anamua na fa'aaloina Iesu o le Poto fa'atagataina ma mauaina le Poto i le tino o Keriso. Ona o le Poto a le Atua, o Keriso e le gata o le so'oupu po o le fesoasoani i le foafoaga; o ia fo'i o le tasi o lo'o u'uina mea uma: "o ia fo'i o le ulua'i o mea uma lava...o lo'o fa'atumuina fo'i mea uma lava ia te ia."

O le vaega lona lua o le pese ua fa'amatala ai Keriso o se ulua'i fanau mai i le fa'asologa o le fa'aolataga. Ona o le atamai a le Atua, sa taūa i fuafuaga a le Atua i le toe aumaia o le tagata i le feagai tatau ai ma le Atua. O le pese ua vala'uina Keriso o le "ulua'i fanau mai o le au malliu" o se fa'aupuga i lona toetu. O lo'o fa'apea mai o iā Keriso o lo'o nofo ai le atoaga o le pai'aga na aumai ai e le Atua le fa'aleleiga i se tulaga fa'avateatea. O le fa'aleleiga ua ia fa'atinoā ua a'afia ai e lē gata o le tagata ae o le foafoaga atoa.

O Keriso le Tupu ua vala'uina i tatou e fa'asoa i lona mālō. O le fa'atomuaga i le pese mai le Kolose 1: 12 – 14 atonu o lo'o atagia mai ai le vaega fa'apatisoga sa mua'i fa'aogā ai le pese. O se vala'au e avatu le fa'afetai i le Atua ona na momoli mai e le Atua i tatou mai le pogisā i le malamalama ma aga'i atu i le "mālō a lona Alo alofagia." O lona moliga na faia i o tatou papatisoga i le maliu o Keriso ma lona toetu. E ala i le papatisoga ua avea ai i tatou ma vaega o le mālō ma o lenei ua au ai i tatou ia Keriso le Tupu.

O Keriso e lē o se tupu masani. O lona tulaga fa'atupu ua pa'i atu i tua ma tauaveina le tulaga tautupu a Tavita o lona tua'ā. O lona tulaga tautupu o lo'o mau'a fa'apitoa i le misitelio a le koluse. O lona tulaga tautupu e alu atu i le foafoaga atoa ma e fa'avavau ma e tatau ona aumaia iā i tatou le mafanafana i le taimi nei ma le fa'amoemoe mo le lumana'i.

FAITAUGA MO LE MASINA O NOVEMA 2022

ASO SA MUAMUA O LE ATEVETU – TAUSAGA A

O le Sulufaga o Keriso le Tupu ua fa'ai'u i ai le tausaga fa'asauniga, ma ua tatou toe fo'i i le ta'amilosaga A ma le tausaga fou i le Evagelia a Mataio, o se Evagelia e tumu i tala fa'atino ma le fa'aleoina so'o mai o le Feagaiga Tuai.

O le Atevetu o se vaitau ua ta'ita'iina atu ai i tatou aga'i i le sulufaga o le Liutino Tagata – toe tepa i tua i le fanau mai o Keriso i Pe-tele-ema, ae amata i le va'ai i luma i le Toe Sau Fa'alua pe a toe sau Keriso e toe fa'aleleia mea uma. O le vevesi o le a maua mai i lenei va'ai i tua ma le va'ai i luma o le a fa'apea ona aumai ai se avanoa e tomanatu ai i le moni o Keriso – o lē na sau i le tala fa'asolopito, o lo'o i ai i le misitelio ma le naunau e sau i le mamalu.

O le upu "Atevetu" o lona uiga o le sau. I le vaitau o le Atevetu ua tatou sauniuni ai mo le sau o Keriso. O le fa vaiaso o le Atevetu ua fa'aillioa mai ai le fa'afe o tausaga na fa'atalitali ai tagata o le Feagaiga Tuai mo le sau o lo tatou Fa'aola.

O le tausaga fou fa'alelotu ua fa'aofi fa'atasi mai ai ma le vaitau o le Atevetu. O se taimi mo sauniuniga fa'aleagaga mo le Kilisimasi – le sulufaga ua tatou patipatia ai le fanau mai o Keriso ma le amataga o la tatou fa'aolataga. O se taimi lenei fa'apitoa i lona fa'apa'iga e le Atua ua vala'auina i tatou ina ia mataala ma sauniuni i le fa'amoemoe fiafia mo le sau o lo tatou Fa'aola, Iesu Keriso.

ASO 27 NOVEMA

Faitauga 1: Isaia 2: 1 – 5: Matua: E fa'apopotoina e le Ali'i o nu'u uma i le manuia o lona mālō e fa'avavau.

Salamo:122: 1 – 2 (tali), 3 – 4 (tali), 8 – 9 (tali): Tali: Na ou fiafia ina ua latou fai mai iā te a'u, tatou te o i le fale o le Ali'i.

Faitauga 2: Roma 13: 11 – 14: Matua: Ua latalata nei iā te i tatou le ola.

Aleluia, Aleluia....Le Ali'i e, ia e fa'aillioa mai iā te i matou lou alofa; ia e foa'iina mai fo'i iā te i matou le palataga mai iā te oe e ... Aleluia.

Evagelia: Mataio 24: 37 – 44: Matua: Ia outou mataala; ia outou nofo sauni.

Tofitofiga O le Upu: Ua tatala e Isaia la tatou Sauniga o le Atevetu i le Upu i se va'aiga matagofie o le fa'amoemoe. Tatou te fa'alogo so'o mai ia Isaia i le vaitau o le Atevetu – o le a tatou fa'alogologo i ana folafolaga i aso Sa ta'itasi ma aso o le vaiaso i le vaega muamua o le vaitau. Ma ua ofoina mai iā i tatou faitauga o folafolaga, faitauga o le fa'amalos'i'au, o perofetaga na avatu i tagata Isaraelu i aso pogisā o le fa'amata'u ma le fefe. E faigofie fo'i i o tatou aso le ola ai i le fefe ma le fa'amata'u – o niusipepa ua matele i le aumaia ia i tatou i aso ta'itasi o tala o le popole ma le pagatia – e ao iā i tatou ona lē amana'iaina, ae mana'omia ona finau e lē pau lea o le moni. O tusitusiga a Sagato Paulo i Roma ma Iesu i le Evagelia ua ofoina mai ia i tatou se lu'itau – taofiofi i le fa'atuatua ua tatou ta'uta'u e ui ua o'o mai taimi faigatā. Ua vala'auina e Paulo ana au faitau ia faia fa'apea ona o le taimi o le pogisa ua mou malie atu, ma o le malamalama o le a sau e fa'atasi ma i tatou. O se fe'au o le fa'amoemoe – o se vala'au ina ia ola ai i le fa'atuatua ua tatou taliaina. Ua aumai e Iesu se lapata'iga: tatou te leiloaina le taimi e toe sau ai Keriso, o afea le i'uga – o tatou po o le i'uga o le lalolagi – o le a leai se fa'aillioaina mai. E le avefa lenā ma se mafua'aga o ni popolega, ae o se mafua'aga mo le ola ai i le fa'amaoni – ola i le fa'atuatua o le tasi ua tatou fa'aillioaina o le ali'i ma le Alo o le Tagata – le tasi ua tatou iloina ma fa'alogo i ai, le tasi ua sau e aumai le fa'aolataga. O le mafua'aga lenā e tatau ai ona fa'alogo iā Isaia i le asō – ma le vaitau atoa o le Atevetu – ona i se lalolagi o lu'itau ma le fa'amata'u, ua fa'amanatu mai e Isaia iā i tatou o mea ua tatou iloina ma talitonu i ai – le folafolaga o se taunu'uga ua alu atu i tua atu o le 'ai, inu, faia o avā, faia o tane' – o se taunu'uga e

'savali ai i le malamalama o le Ali'i'.

'O fafine e to'alua i le vao, ua avefa le tasi ae tu'ua le tasi'. O lena pototo masani sa fa'alavelave sa'o lava pe na a'afia mamao atu i so'o se isi a o latou iloina e mafai ona tupu se mea i se tasi o tagata i lo le isi. O lo'o fa'asino Iesu i le fa'ata'ita'iga o mea na tutupu ia Noa ina ua tupu se faiga fa'aapolokalifa na suia ai mea uma: o tagata ua 'a'ai ma inu, ua latou fai avā fo'i ma fa'aavaga.' O mea uma ua foliga mai e lelei se'ia o'o i le taimi mulimuli ma e le'i masalomia lava se mea o le a tupu. Ae na avatu e Iesu se fa'aaliga o mea o le a tupu, ma lapata'ia latou sa fa'alogologo iā te ia ina ia mataala ma sauniuni. Ma o Paulo, na tusi i tagata Roma, ofoina atu se lu'itau e tutusa fa'apea. I le suia o mea na tutupu na foliga mai ua fai fua ae mo tagata o le fa'atuatua, o le ola i le malamalama o lona uiga ua mafai ona latou va'aia ma fa'auga le lalolagi ma o latou olaga. Mo mea na aumai e Iesu ma Paulo e le'i va'aia o ni fa'amata'u, ae o se lumana'i ina ia fa'amaopo mai. Ua aumai e le perofeta o Isaia se va'ai mamao o mea o le a tutupu pe a sau le Alo o le Tagata, ma e mamalu: O tagata ma nu'u uma o le a mafai ona savali i le malamalama ole Ali'i. Ua tatou fa'alogo so'o mai le perofeta o Isaia i vaitau o le Fagafulu – i aso Sa ma aso aunoa – ma o faitauga ua tatou fa'alogo i ai e masani o ni vala'au o le fa'amalos'i'au i le fa'amoemoe – e ta'ua tele lenā e pei ona ua tatou fa'alogo i lea aso ma lea aso i le tele ua aumai ai le fa'avaivai loto ma le fa'anoanoa. O le avefa ma Kerisiano o le avefa lea o se tagata e ola ai lona olaga i aso ta'itasi i folagafolaga na aumai e le Atua.



FAITAUGA MO ASO SA MUAMUA O TESEMA 2022– TAUSAGA A

ASO SA 2 O LE ATEVETU

Faitauga 1: Isaia 11: 1 – 10

Matua: E fa'amasino o ia ma le tonu i e matitiva.

Salamo: 72: 1 – 2 (tali), 7 – 8 (tali), 12 – 13 (tali), 17 (tali)

Tali: O lana nofoaiga e tupu olaola mai ai lē ua amiotonu.

Faitauga 2: Roma 15: 4 – 9

Matua: Ua fa'aolaina e Keriso tagata uma lava.

Aleluia, Aleluia...*Inā teuteu is outou le ala o le Ali'i, ia fa'alaulelei ona ala. E va'aia e tagata uma le fa'aolataga mai le Atua*
...Aleluia.

Evagelia: Mataio 3: 1 – 12

Matua: Inā salamō ia outou, auā ua latalata mai le malō o le lagi.

18

FA'ASOLOGA O MISASA SAMOA MO NOVEMA 2022

Aso Sa Muamua			
6 Novema 2022	09:00 am	Holy Trinity—Seatoun	Patele Taisali
	11:00 am	Titahi Bay	Patele Taisali
	11:00 am	Porirua	Patele Andrew
Aso Sa Lua			
13 Novema 2021	12:00 pm	Te Awakairangi —Naenae (Lower Hutt & Taita)	Patele Maleko
Aso Sa Tolu			
20 Novema 2021	11:00 am	Newtown	Patele Taisali
	11:00 am	Holy Family	Patele Andrew
Aso Sa Fa			
27 Novema 2021	09:30 am	Te Wairua Tapu —Petone (Wainuiomata & Petone)	Patele Taisali
	11:30 am	Stokes Valley	Patele Maleko

Mikaele Teofilo:

✉ m.teofilo@wn.catholic.org.nz

☎ +64 4 496 1707

☎ 021 0818 5037

✉ PO Box 1937, Wellington 6140, New Zealand